



**REPUBLIKA E SHQIPËRISË  
KUVENDI**

**PROJEKT LIGJ**

Nr. \_\_\_\_\_/2025

**PËR**

**IDENTIFIKIMIN ELEKTRONIK, SHËRBIMET E BESUARA DHE PORTOFOLIN E  
IDENTITETIT DIGJITAL<sup>1</sup>**

Në mbështetje të neneve 78, 81, pika 1, dhe 83, pika 1, të Kushtetutës, me propozimin e Këshillit të Ministrave,

**KUVENDI  
I REPUBLIKËS SË SHQIPËRISË**

**VENDOSI:**

**KREU I  
DISPOZITA TË PËRGJITHSHME**

**Neni 1**

**Qëllimi**

---

<sup>1</sup> Ky ligj është përafshuar plotësisht me Rregulloren eIDAS 1 nr.910/2014 Mbi identifikimin elektronik dhe shërbimet e besimit për transaksionet elektronike në tregun e brendshëm dhe shfuqizimin e Direktivës 1999/93/EC dhe Rregulloren nr. 2024/1183 të Parlamentit Evropian dhe Këshillit të datës 11 Prill 2024, që ndryshon Rregulloren (BE) Nr. 910/2014 lidhur me krijimin e Identitetit Digjital Evropian dhe Rregulloren nr. 2024/1183 të Parlamentit Evropian dhe Këshillit të datës 11 Prill 2024, që ndryshon Rregulloren (BE) Nr. 910/2014 lidhur me krijimin e Identitetit Digjital Evropian , Fletorja Zyrtare e Bashkimit Evropian, Seria L, 2024/1183 datë 30.04.2024, faqe 73-114”.

1. Qëllimi i këtij ligji është garantimi i një niveli të përshtatshëm të sigurisë në përdorimin e mjeteve të identifikimit elektronik dhe shërbimeve të besuara duke mundësuar dhe lehtësuar për personat fizik dhe juridik të drejtën për të marrë pjesë në mënyrë të sigurt në shoqërinë digjitale si dhe për të përdorur shërbimet publike dhe private online.

2. Ky ligj gjithashtu përcakton rregullat për:

- a) kushtet për njoftimin e skemave të identifikimit elektronik si dhe Portofolit të Identitetit Digjital;
- b) shërbimet e besuara, veçanërisht për transaksionet elektronike;
- c) nënshkrimin elektronik, vulat elektronike, vulat kohore elektronike, dokumentin elektronik, shërbimin elektronik të regjistruar të transmetimit, autentifikimin e faqeve të internetit, arkivimin elektronik dhe vërtetimin elektronik të attributeve, menaxhimin e pajisjeve të krijimit të nënshkrimit elektronik, menaxhimin e pajisjeve të krijimit të vulës elektronike dhe regjistrat elektronikë.

## **Neni 2**

### **Objekti dhe fusha e veprimit**

1. Ky ligj zbatohet për shërbimet e besuara, për skemat e identifikimit elektronik, transaksionet elektronike, portofolat e identitetit digjital si dhe për ofruesit e shërbimeve të besuara, të cilët ushtrojnë veprimtarinë në Republikën e Shqipërisë.

2. Ky ligj përcakton kushtet për ndërveprim dhe njohjen ndërkufitare të mjeteve të identifikimit elektronik të personave fizikë dhe juridikë, që bëjnë pjesë nën një skemë të identifikimit elektronik.

3. Ky ligj nuk zbatohet për ofrimin e shërbimeve të besuara të përdorura ekskluzivisht në sisteme të mbyllura, të cilat rrjedhin nga legjislacioni shqiptar apo marrëveshje ndërmjet një grupi të caktuar pjesëmarrësish, si dhe në rastet kur në legjislacionin në fuqi parashikohet ndryshe.

4. Ky ligj nuk prek vlefshmërinë e kontratave për sa i përket formës dhe efekteve ligjore ose detyrimeve të tjera ligjore apo procedurale të lidhur me kërkesat specifike të sektorit.

## **Neni 3**

### **Përkufizimet**

Për qëllime të kësaj rregulloreje, zbatohen përkufizimet e mëposhtme:

- 1. **“Autoriteti”** është autoriteti përgjegjës për rregullimin dhe mbikëqyrjen e fushës së identifikimit elektronik, shërbimeve të besuara dhe Portofolit të Identitetit Digjital, i krijuar nëpërmjet ligjit për sigurinë kibernetike në Republikën e Shqipërisë.
- 2. **“Arkivim elektronik”** është një shërbim që siguron marrjen, ruajtjen, rikthimin dhe fshirjen e të dhënave elektronike dhe dokumenteve elektronike me qëllim që të sigurohet qëndrueshmëria dhe lexueshmëria e tyre, si dhe të ruhet integriteti, konfidencialiteti dhe vërtetimi i origjinës gjatë gjithë periudhës së ruajtjes;
- 3. **“Atribut”** nënkupton një karakteristikë, cilësi, të drejtë ose leje të një personi fizik ose juridik ose të një objekti;

4. **“Autentifikim”** është një proces elektronik që mundëson konfirmimin e identifikimit elektronik të një personi fizik ose juridik ose konfirmimin e origjinës dhe integritetit të të dhënave në formë elektronike;
5. **“Autentifikim i fortë i përdoruesit”** është një autentifikim i bazuar në përdorimin e të paktën dy faktorëve autentifikimi nga kategori të ndryshme si njohuria, diçka që vetëm përdoruesi e di, posedimi diçka që vetëm përdoruesi e zotëron ose qenësia, diçka që përdoruesi është, të cilat janë të pavarura nga njëra tjetra në mënyrë që shkelja e njërit nuk cenon besueshmërinë e të tjerëve dhe është projektuar në mënyrë të tillë që të mbrojë konfidencialitetin e të dhënave të autentifikimit;
6. **“Burim autentik”** është një hapësirë në memorie (*repository*) ose sistem, i mbajtur nën përgjegjësinë e një organi të sektorit publik ose subjektit privat, që mban dhe ofron attribute për një person fizik ose person juridik ose objekt dhe që konsiderohet të jetë burimi kryesor i atij informacioni ose i njohur si autentik në përputhje me ligjin kombëtar, ose legjisllacionin e Bashkimit Evropian duke përfshirë edhe praktikën administrative;
7. **Certifikatë për autentifikim faqesh interneti** është një vërtetim elektronik i cili bën të mundur autentifikimin e një faqeje interneti dhe lidh faqen e internetit me personin fizik apo juridik, të cilit i është lëshuar kjo certifikatë;
8. **“Certifikatë e kualifikuar për autentifikim faqesh interneti”** është një certifikatë për autentifikim faqesh interneti, e cila është lëshuar nga një Ofrues i Kualifikuar i Shërbimit të Besuar dhe plotëson kërkesat e përcaktuara në aneksin IV të këtij ligji;
9. **“Certifikatë për nënshkrim elektronik”** është një vërtetim elektronik që lidh të dhënat e verifikimit të nënshkrimit elektronik me një person fizik dhe konfirmon të paktën emrin ose pseudonimin e atij personi;
10. **“Certifikatë e kualifikuar për nënshkrim elektronik”** është një certifikatë për nënshkrim elektronik, që është lëshuar nga një Ofrues i Kualifikuar i Shërbimit të Besuar dhe plotëson kushtet e përcaktuara në aneksin I të këtij ligji;
11. **“Certifikatë për vulë elektronike”** është një vërtetim elektronik që lidh të dhëna të vërtetimit të vlefshmërisë së vulës elektronike me një person juridik dhe konfirmon emrin e këtij personi;
12. **“Certifikatë e kualifikuar për vulë elektronike”** është një certifikatë për vulë elektronike, që është lëshuar nga një Ofrues i Kualifikuar i Shërbimit të Besuar dhe plotëson kërkesat e përcaktuara në aneksin III të këtij ligji;
13. **“Dokument elektronik”** është çdo përmbajtje e ruajtur në formë elektronike, në veçanti në formë teksti ose zëri, regjistrim vizual ose audiovizual.
14. **“Grupi Evropian i Identitetit Digjital”**, është një organ i krijuar nga Rregullorja (BE) nr. 2024/1183 e Parlamentit dhe Këshillit Evropian, e datës 11 prill 2024, për të mbështetur dhe lehtësuar bashkëpunimin dhe shkëmbimin e informacionit mbi shërbimet e besuara, portofolat e identitetit digjital dhe skemat e identifikimit elektronik midis shteteve anëtare të Bashkimit Evropian.

15. **“Identifikim elektronik”** është procesi i përdorimit të të dhënave identifikuese të personit në formë elektronike që përfaqësojnë në mënyrë unike një person fizik ose juridik, ose një person fizik që përfaqëson një person juridik;
16. **“Kontrollues i aksesit (gatekeeper)”**, është një ndërmarrje e cila ofron shërbime të platformave bërthamë si dhe plotëson kriteret e mëposhtme:
  - a) ka një ndikim të rëndësishëm në tregun e brendshëm;
  - b) ofron një shërbim të platformës bërthamë që është një portë e rëndësishme për përdoruesit e biznesit për të arritur tek përdoruesit fundor;
  - c) mban një pozicion të pandryshueshëm dhe të qëndrueshëm në operacionet e tij ose është e parashikueshme që do të mbajë një pozicion të tillë në të ardhmen e afërt.
17. **“Krijuesi i një vule elektronike”** është një person juridik, i cili krijon një vulë elektronike;
18. **“Marka e besuar e portofolit të identitetit digjital ”** nënkupton një tregues të verifikueshëm, të thjeshtë dhe të dallueshëm, i cili komunikon në mënyrë të qartë se portofoli i identitetit digjital është siguruar në përputhje me përcaktimet e bëra në këtë ligj;
19. **“Mjete të identifikimit elektronik”** janë njësi materiale ose jo materiale që përmbajnë të dhënat e identifikimit personal ose karakteristikat që së bashku formojnë identifikuesit, të cilat mundësojnë autentifikimin në një shërbim online ose aty ku është e mundur off-line;
20. **“Modaliteti offline ”** është një ndërveprim ndërmjet një përdoruesi dhe një pale të tretë në një vendndodhje fizike duke përdorur teknologji që procesojnë në afërsi, ku portofolit të identitetit digjital nuk i kërkohet të aksesojë sistemet në distancë nëpërmjet rrjeteve të komunikimit elektronik për qëllime të ndërveprimit.
21. **“Nënshkrim elektronik”** janë të gjitha të dhënat në formën elektronike, të cilat u bashkëlidhen ose shoqërojnë logjikisht të dhëna të tjera elektronike, dhe që përdoren nga nënshkruesi për të nënshkruar.
22. **“Nënshkrimet elektronike të avancuara”** janë nënshkrimet elektronike, të cilat plotësojnë kushtet e përcaktuara në nenin 35 të këtij ligji.
23. **“Nënshkrimet elektronike të kualifikuara”** janë nënshkrimet elektronike të avancuara, të cilat janë krijuar nga pajisje për krijimin e nënshkrimit elektronik të kualifikuar dhe që mbështeten në një certifikatë të kualifikuar për nënshkrimet elektronike;
24. **“Nënshkrues”** është një person fizik, i cili krijon një nënshkrim elektronik;
25. **“Ofruesi i Shërbimit të Besuar”** është person fizik ose juridik, publik ose privat, i cili ofron një ose më shumë shërbime të besuara si ofrues i kualifikuar i shërbimit të besuar ose si ofrues jo i kualifikuar i shërbimit të besuar;
26. **“Ofruesi i Kualifikuar i Shërbimit të Besuar”** është një ofrues i shërbimit të besuar, që ofron një apo më shumë shërbime të besuara të kualifikuara, të cilit i është dhënë statusi i kualifikuar nga Autoriteti;
27. **“Organ publik”** është autoriteti shtetëror në nivel qendror, rajonal ose vendor, shoqëritë tregtare shtetërore përgjegjëse për ofrimin e shërbimeve publike elektronike, si dhe entitetet private të autorizuar për të ofruar një shërbim publik elektronik në kuptim të këtij ligji;

28. **“Organe të vlerësimit të konformitetit”** janë organet kompetente të cilët kryejnë aktivitete të vlerësimit të konformitetit duke përfshirë kalibrimin, testimin, certifikimin dhe inspektimin të akredituara sipas legjislacionit në fuqi për akreditimin i cili kryen vlerësimet e konformitetit të veprimtarisë së një Ofruesi të Kualifikuar të Shërbimit të Besuar ose shërbimeve të besuara të ofruara prej tij ose certifikimin e portofolit të identitetit digjital ose të mjeteve të identifikimit elektronik;
29. **“Produkt”** është *hardware* ose *software*, ose komponentët përkatës të *hardware* ose *software*, të cilat përdoren për ofrimin e shërbimeve të besuara dhe identifikimin elektronik;
30. **“Pajisje të krijimit të nënshkrimit elektronik”** janë produkte *hardware* dhe *software* të konfiguruar për këtë qëllim, për të krijuar një nënshkrim elektronik;
31. **“Pajisje të krijimit të nënshkrimeve elektronike të kualifikuar”** është një pajisje për krijimin e nënshkrimit elektronik që plotëson kërkesat e përcaktuara në aneksin II të këtij ligji;
32. **“Pajisje të krijimit të nënshkrimit elektronik të kualifikuar në distancë”** është një pajisje për krijimin e nënshkrimit elektronik të kualifikuar që menaxhohet nga një ofrues i kualifikuar i shërbimit të besuar në përputhje me nenin 39 të këtij ligji në emër të një nënshkruesi.
33. **“Pajisje e krijimit të vulës elektronike”** është produkt *software* ose *hardware* i konfiguruar për këtë qëllim, i cili përdoret për të krijuar një vulë elektronike;
34. **“Pajisje të krijimit të vulës elektronike të kualifikuar”** është mjet i krijimit të vulës elektronike, i cili plotëson për aq sa është e mundur kërkesat e përcaktuara në aneksin II të këtij ligji;
35. **“Pajisje të krijimit të vulës elektronike të kualifikuar në distancë”** është një pajisje për krijimin e vulës elektronike, që menaxhohet nga një ofrues i kualifikuar i shërbimit të besuar në përputhje me nenin 51 të këtij ligji në emër të një krijuesi të vulës;
36. **“Palë e përfshirë”** është një person fizik ose juridik që mbështetet në identifikimin elektronik, portofolat e identitetit digjital ose mjete të tjera identifikimi elektronik, ose në një shërbim të besuar;
37. **“Përdorues”** është një person fizik ose juridik, ose një person fizik që përfaqëson një person tjetër fizik ose një person juridik, që përdor shërbime të besuara ose mjete të identifikimit elektronik të ofruara në përputhje me këtë ligj;
38. **“Përdorues biznesi”**, është çdo person fizik ose juridik që vepron në kapacitet tregtar ose profesional duke përdorur shërbimet e platformave bërthamë për qëllimin e ofrimit ose gjatë ofrimit të mallrave dhe shërbimeve për përdoruesit fundor.
39. **“Përputhja e identitetit”** është një proces ku të dhënat e identifikimit të personit ose mjetet elektronike të identifikimit përputhen ose lidhen me një llogari ekzistuese që i përket të njëjtit person;
40. **“Portofoli i Identitetit Digjital”**, në vijim Portofoli, është një mjet identifikimi elektronik që i lejon përdoruesit të ruajë, menaxhojë dhe vërtetojë në mënyrë të sigurt të dhënat e identifikimit të personit dhe vërtetimeve elektronike të attributeve me qëllim ofrimin e tyre palëve të përfshira dhe përdoruesve të tjerë të Portofolave të identitetit digjital dhe të nënshkruajë me anë të

nënshkrimeve elektronike të kualifikuara ose të vulosë me anë të vulave elektronike të kualifikuara;

41. **“Regjistër elektronik”** është një *sekuencë* e regjistrimeve elektronike të të dhënave, që siguron integritetin dhe saktësinë e renditjes kronologjike të këtyre regjistrimeve;
42. **“Regjistër elektronik i kualifikuar”** është një regjistër elektronik i cili ofrohet nga një ofrues i kualifikuar i shërbimit të besuar i cili plotëson kërkesat e përcaktuara në nenin 70 të këtij ligji;
43. **“Regjistrim i të dhënave”** janë të dhënat elektronike të regjistruara së bashku me shpjegimet përkatëse që mbështesin përpunimin e të dhënave;
44. **“Skema e identifikimit elektronik”** është një sistem i identifikimit elektronik, sipas të cilit mjetet e identifikimit elektronik u lëshohen personave fizikë ose juridikë ose personave fizikë që përfaqësojnë persona të tjerë fizikë ose juridikë;
45. **“Shërbim i arkivimit elektronik të kualifikuar”** nënkupton një shërbim arkivimi elektronik i cili ofrohet nga një ofrues i kualifikuar i shërbimit të besuar dhe që plotëson kërkesat e përcaktuara në nenin 68 të këtij ligji;
46. **“Shërbimi i besuar”** është shërbimi elektronik i ofruar me pagesë i cili konsiston në:
  - a) lëshimin e certifikatave për nënshkrimet elektronike, certifikatat për vulat elektronike, certifikatat për autentifikimin e faqes së internetit ose certifikatat për ofrimin e shërbimeve të tjera të besuara;
  - b) vërtetimin e certifikatave për nënshkrimet elektronike, certifikatat për vulat elektronike, certifikatat për autentifikimin e faqes së internetit ose certifikatat për ofrimin e shërbimeve të tjera të besuara;
  - c) krijimin e nënshkrimeve elektronike ose vulave elektronike;
  - ç) vlefshmërinë e nënshkrimeve elektronike ose vulave elektronike;
  - d) ruajtjen e nënshkrimeve elektronike, vulave elektronike, certifikatave për nënshkrime elektronike ose certifikatave për vula elektronike;
  - dh) menaxhimin e pajisjeve për krijimin e nënshkrimeve elektronike në distancë (remote) ose pajisjeve të krijimit të vulave elektronike në distancë;
  - e) lëshimin e vërtetimeve elektronike të attributeve;
  - ë) vlefshmërinë e vërtetimit elektronik të attributeve;
  - f) krijimin e vulave kohore elektronike;
  - g) vlefshmërinë e vulave kohore elektronike;
  - gj) ofrimin e shërbimeve të transmetimit (*delivery*) elektronik të regjistruar;
  - h) vërtetimin e të dhënave të transmetuara nëpërmjet shërbimeve të transmetimit elektronik të regjistruar dhe dëshmive përkatëse;
  - i) arkivimin elektronik të të dhënave elektronike dhe dokumenteve elektronike;
  - j) regjistrimin e të dhënave elektronike në një regjistër elektronik;
47. **“Shërbim i besuar i kualifikuar”** është një shërbim i besuar i cili plotëson kërkesat e përcaktuara në këtë ligji;
48. **“Shërbimi i transmetimit elektronik të regjistruar”** është një shërbim që bën të mundur transmetimin e të dhënave midis palëve të treta nëpërmjet mjeteve elektronike dhe siguron

- provë në lidhje me trajtimin e të dhënave të transmetuara, duke përfshirë dëshmi mbi dërgimin dhe marrjen e të dhënave dhe që mbron të dhënat e transmetuara kundër rrezikut të humbjes, vjedhjes, dëmtimit apo çdo ndryshimi tjetër të paautorizuar;
49. **“Shërbimi i transmetimit elektronik të kualifikuar të regjistruar”** është një shërbim i transmetimit elektronik të regjistruar, ofrimi i të cilit plotëson kërkesat e parashikuara në nenin 57 të këtij ligji;
50. **“Shërbimet e platformave bërthamë”** janë shërbimet si vijon:
- a) shërbimet e ndërmjetësimit në internet;
  - b) motorët e kërkimit në internet;
  - c) shërbimet e rrjeteve sociale në internet;
  - ç) shërbimet e platformave të ndarjes së videove;
  - d) shërbimet e komunikimeve ndërpersonale të pavarura nga numri;
  - dh) sistemet operative;
  - e) shfletuesit e internetit;
  - ë) asistentët virtual;
  - f) shërbimet *cloud computing*;
  - g) shërbimet e reklamimit në internet duke përfshirë çdo rrjet reklamimi, shkëmbim reklamimi ose çdo shërbim tjetër ndërmjetësimi reklamimi të mundësuar nga një ndërmarrje që ofron ndonjë nga shërbimet e platformave bërthamë të përmendura në shkronjat “a - f” të kësaj pike;
51. **“Të dhëna personale”** sipas këtij ligji, ka të njëjtin kuptim me përkufizimin e dhënë në legjislacionin në fuqi për mbrojtjen e të dhënave personale.
52. **“Të dhënat e identifikimit personal”** është një tërësi të dhënash të cilat mundësojnë identifikimin e personit fizik, ose personit juridik, ose personi fizik i cili përfaqëson personin juridik;
53. **“Të dhënat e krijimit të nënshkrimit elektronik”** janë të dhëna unike që përdoren nga nënshkruesi për të krijuar një nënshkrim elektronik;
54. **“Të dhënat e krijimit të vulës elektronike”** janë të dhëna unike, të cilat përdoren nga krijuesi i vulës elektronike, për të krijuar një vulë elektronike;
55. **“Të dhënat e vërtetimit të vlefshmërisë”** janë të dhëna të cilat përdoren për të vërtetuar një nënshkrim elektronik ose një vule elektronike;
56. **“Vërtetim elektronik i attributeve”** nënkupton një vërtetim në formë elektronike që lejon autentifikimin e attributeve;
57. **“Vërtetim elektronik i attributeve të lëshuar nga ose në emër të një organi të sektorit publik përgjegjës për një burim autentik”** është një vërtetim elektronik i attributeve të lëshuar nga një organ i sektorit publik që është përgjegjës për një burim autentik ose nga një organ i sektorit publik që është caktuar si i tillë për të lëshuar vërtetime të tilla të attributeve në emër të organeve të sektorit publik përgjegjës për burimet autentike në përputhje me nenin 64 dhe me aneksin VII të këtij ligji;

58. **“Vërtetim elektronik i kualifikuar i attributeve”** nënkupton një vërtetim elektronik të attributeve, i cili lëshohet nga një ofrues i kualifikuar i shërbimit të besuara dhe plotëson kërkesat e përcaktuara në aneksin V të këtij ligji;
59. **“Vërtetimi i vlefshmërisë”** është procesi i verifikimit dhe konfirmimit të të dhënave në formë elektronike që janë të vlefshme në përputhje me përcaktimet e bëra në këtë ligj;
60. **Vulë elektronike** janë të dhëna në formë elektronike të cilat janë bashkangjitur ose të lidhura logjikisht me të dhëna të tjera në formë elektronike, për të siguruar origjinën dhe integritetin e këtyre të fundit;
61. **“Vulë elektronike e avancuar”** është një vulë elektronike, e cila plotëson kërkesat e përcaktuara në nenin 47 të këtij ligji;
62. **“Vulë elektronike e kualifikuar”** është vulë elektronike e avancuar e cila është krijuar nga një pajisje krijimi vule elektronike të kualifikuar, dhe është e bazuar në një certifikatë të kualifikuar për vulë elektronike;
63. **“Vulë kohore elektronike”** janë të dhënat në formë elektronike, të cilat lidhin të dhëna të tjera në formë elektronike me një kohë të caktuar që vërtetojnë se këto të dhëna kanë ekzistuar në atë kohë;
64. **“Vulë kohore elektronike e kualifikuar”** janë vula kohore elektronike të cilat plotësojnë kërkesat e parashikuara në nenin 55 të këtij ligji;

#### **Neni 4**

##### **Autoriteti mbikëqyrës**

Autoriteti Kombëtar për Sigurinë Kibernetike është autoriteti përgjegjës për rregullimin dhe mbikëqyrjen e fushës së identifikimit elektronik , shërbimeve të besuara dhe Portofolit të Identitetit Digjital në Republikën e Shqipërisë.

#### **Neni 5**

##### **Parimi i tregut të brendshëm**

1. Me anëtarësimin e Republikës së Shqipërisë në Bashkimin Evropian nuk do të ketë asnjë kufizim në ofrimin e shërbimeve të besuara në territorin e një Shteti Anëtar nga një ofrues i shërbimeve të besuara themeluar në Republikën e Shqipërisë të cilët operojnë brenda fushave të përcaktuara në këtë ligj.
2. Produktet dhe shërbimet e besuara që plotësojnë kërkesat e këtij ligji, lejohen të qarkullojnë lirshëm në tregun e brendshëm evropian.

#### **Neni 6**

##### **Përdorimi i pseudonimit**

Në një transaksion elektronik lejohet përdorimi i pseudonimeve, përveç rasteve kur legjislacioni në fuqi kërkon shprehimisht përdorimin e identitetit personal.

## Neni 7

### Portofoli i Identitetit Digjital

1. Me qëllim që të sigurohet që të gjithë personat fizikë dhe juridikë të kenë akses të sigurt, të besueshëm dhe të pandërprerë në shërbimet publike dhe private, duke pasur kontroll të plotë mbi të dhënat e tyre Republika e Shqipërisë do të sigurojë të paktën një Portofol të Identitetit Digjital.
2. Kodi burim i komponentëve të *software* të aplikacionit të Portofolit të sigurohet të jetë me burim të hapur të licencuar. Për arsye të justifikuara, kodi burim i komponentëve të veçantë të ndryshëm nga ata të instaluar në pajisjet e përdoruesit nuk ekspozohet.
3. Portofoli i mundëson përdoruesit, një mënyrë të lehtë përdorimi, transparente, të gjurmueshme prej tij me qëllim që të:
  - a) kërkojë, marr, zgjedh, kombinoj, ruaj, fshijë, shpërndajë dhe paraqesë në mënyrë të sigurt, nën kontrollin e vetëm të tij, të dhënat e identifikimit të personit dhe kur është e zbatueshme, në kombinim me vërtetimet elektronike të atributëve, për t'u vërtetuar palëve të përfshira online dhe në *modalitetin offline*, me qëllim pasjen akses në shërbimet publike dhe private, duke siguruar, aty ku është e mundur marrjen selektive të të dhënave;
  - b) gjenerojë pseudonime dhe t'i ruajë ato të koduara brenda Portofolit;
  - c) të vërtetojë në mënyrë të sigurt portofolin e identitetit digjital të një personi tjetër dhe të marrë dhe të ndajë të dhënat e identifikimit të personit dhe vërtetimet elektronike të atributëve në një mënyrë të sigurt midis Portofolit të Republikës së Shqipërisë dhe Portofolit të shteteve të tjera evropiane.
  - ç) ketë akses në loge të të gjitha transaksioneve të kryera përmes Portofolit nëpërmjet një paneli të përbashkët që i mundëson përdoruesit të:
    - i. shikojë një listë të përditësuar të palëve të përfshira me të cilat ai ka krijuar një lidhje dhe, sipas rastit, të gjitha të dhënat e shkëmbyera;
    - ii. kërkojë lehtësisht fshirjen nga një palë e përfshirë të të dhënave personale në përputhje me legjislacionin në fuqi për mbrojtjen e të dhënave personale;
    - iii. raportojë një palë të përfshirë tek autoriteti përgjegjës i mbrojtjes së të dhënave personale, kur merret një kërkesë për të dhëna e cila është e paligjshme ose e dyshimtë;
  - d) nënshkruajë me anë të nënshkrimeve elektronike të kualifikuara ose të vulos me anë të vulave elektronike të kualifikuara;
  - dh) shkarkojë, për aq sa është teknikisht e mundur, të dhënat e tij, vërtetimin elektronik të atributëve dhe konfigurimet;
  - e) ushtrojë të drejtat e përdoruesit për bartjen e të dhënave.
4. Portofoli, në veçanti:

- a) mbështet protokollet dhe ndërfaqet e përbashkëta për:
- i. lëshimin e të dhënave të identifikimit të personit, vërtetimeve elektronike të kualifikuara dhe të pakualifikuara të attributeve ose certifikatave të kualifikuara dhe të pakualifikuara në Portofol;
  - ii. të kërkuar dhe vërtetuar të dhënat e identifikimit të personit dhe vërtetimet elektronike të attributeve për palët e përfshira;
  - iii. ndarjen dhe paraqitjen tek palët e përfshira të dhënat e identifikimit të personit, vërtetimin elektronik të attributeve ose të dhënat e lidhura të marra në mënyrë përzgjedhëse online dhe në *modalitetin offline*;
  - iv. të lejuar përdoruesin të ndërveprojë me Portofolin dhe të paraqesë një markë të besuar të këtij Portofoli;
  - v. pranimin e sigurt të përdoruesit në një sistem ose shërbim duke përdorur një mjet identifikimi elektronik në përputhje me përcaktimet e pikës 23 të këtij neni;
  - vi. ndërveprim ndërmjet Portofolave të dy personave me qëllim të marrjes, vërtetimit dhe ndarjes së të dhënave të identifikimit të personit dhe vërtetimeve elektronike të attributeve në mënyrë të sigurt;
  - vii. autentifikimin dhe identifikimin e palëve të përfshira duke zbatuar mekanizmat e autentifikimit në përputhje me nenin 8 të këtij ligji;
  - viii. palët e përfshira për të verifikuar vërtetësinë dhe vlefshmërinë e Portofolave;
  - ix. t'i kërkuar palës së përfshirë fshirjen e të dhënave personale në përputhje me legjislacionin në fuqi për mbrojtjen e të dhënave personale;
  - x. raportimin e një pale të përfshirë te autoriteti përgjegjës për mbrojtjen e të dhënave personale kur është marrë një kërkesë për të dhëna të paligjshme ose të dyshimta;
  - xi. krijimin e nënshkrimeve elektronike të kualifikuara ose vulave elektronike nëpërmjet nënshkrimeve elektronike të kualifikuara ose pajisjeve për krijimin e vulave elektronike;
- b) të mos japë asnjë informacion tek ofruesit e shërbimeve të besuara të vërtetimeve elektronike të attributeve në lidhje me përdorimin e këtyre vërtetimeve elektronike;
- c) të sigurojë që palët e përfshira të vërtetohen dhe identifikohen duke zbatuar mekanizmat e autentifikimit në përputhje me nenin 8 të këtij ligji;
- ç) të përmbushë kërkesat e përcaktuara në nenin 15 të këtij ligji në lidhje me nivelin e lartë të sigurisë, veçanërisht kur zbatohet për kërkesat për vërtetimin dhe verifikimin e identitetit, menaxhimin dhe vërtetimin e mjeteve të identifikimit elektronik;
- d) zbaton politika të mirëpërcaktuara të zbulimit të informacionit dhe mekanizma të duhura për të informuar përdoruesin në rastin e vërtetimit elektronik të attributeve se pala e përfshirë ose përdoruesi i Portofolit që kërkon vërtetimin elektronik të attributeve ka të drejtën për të aksesuar këto vërtetime;
- dh) të sigurojë që të dhënat e identifikimit të personit, të cilat janë të disponueshme nga skema e identifikimit elektronik, sipas së cilës ofrohet Portofoli përfaqësojnë në mënyrë unike personin fizik, personin juridik ose personin fizik që përfaqëson personin fizik ose juridik dhe është i lidhur me Portofolin;

e) t'u ofrojnë të gjithë personave fizikë mundësinë për të nënshkruar me anë të nënshkrimeve elektronike të kualifikuara pa pagesë.

Pavarësisht përcaktimit të shkronjës “e” të kësaj pike Republika e Shqipërisë mund të parashikojë masa proporcionale për të siguruar që përdorimi i nënshkrimeve elektronike të kualifikuara pa pagesë nga personat fizikë është i kufizuar për qëllime joprofesionale.

5. Ofruesi i shërbimit të Portofolit informon menjëherë përdoruesit për çdo shkelje të sigurisë që mund të ketë komprometuar tërësisht ose pjesërisht Portofolin e tyre ose përmbajtjen e tij, veçanërisht nëse Portofoli i tyre është pezulluar ose anuluar në përputhje me nenin 11 të këtij ligji.

6. Pa rënë ndesh me nenin 12 të këtij ligji, Republika e Shqipërisë mund të parashikojë, në përputhje me legjislacionin kombëtar, për funksione shtesë të Portofolave, duke përfshirë ndërveprimin me mjetet ekzistuese kombëtare të identifikimit elektronik. Këto funksione shtesë do të jenë në përputhje me këtë nen.

7. Republika e Shqipërisë siguron mekanizma të vlefshmërisë pa pagesë, me qëllim që:

a) të sigurojë që vërtetësia dhe vlefshmëria e Portofolave mund të verifikohet;

b) të lejojë përdoruesit të verifikojnë vërtetësinë dhe vlefshmërinë e identitetit të palëve të treta të regjistruara në përputhje me nenin 8 të këtij ligji.

8. Republika e Shqipërisë siguron që vlefshmëria e Portofolit anulohet në rrethanat e mëposhtme:

a) me kërkesë të qartë të përdoruesit;

b) kur siguria e Portofolit është komprometuar;

c) me vdekjen e përdoruesit ose me ndërprerjen e veprimtarisë së personit juridik.

9. Ofruesit e Portofolave sigurojnë që përdoruesit të mund të kërkojnë lehtësisht mbështetje teknike dhe të raportojnë probleme teknike ose çdo incident tjetër që ka një ndikim negativ në përdorimin e Portofolave.

10. Portofolat sigurohen sipas një skeme identifikimi elektronik me nivel të lartë sigurie.

11. Portofolat garantojnë siguri që në projektim.

12. Lëshimi, përdorimi dhe anulimi i Portofolave është pa pagesë për të gjithë personat fizikë.

13. Përdoruesit kanë kontroll të plotë në përdorimin e të dhënave në Portofolin e tyre. Ofruesi i Portofolit nuk do të mbledhë informacione në lidhje me përdorimin e Portofolit, i cili nuk është i nevojshëm për ofrimin e shërbimeve të Portofolit, as nuk do të ndërlidh të dhëna të identifikimit të personit ose ndonjë të dhënë tjetër personale të ruajtur ose në lidhje me përdorimin e Portofolit me të dhëna personale nga çdo shërbim tjetër i ofruar nga ai ofrues ose nga shërbime të palëve të treta, të cilat nuk janë të nevojshme për ofrimin e shërbimeve të Portofolit, përveç nëse përdoruesi ka kërkuar shprehimisht ndryshe. Të dhënat personale në lidhje me ofrimin e Portofolit do të mbahen logjikisht të ndara nga çdo e dhënë tjetër e mbajtur nga ofruesi i Portofolit. Nëse Portofoli ofrohet nga palë private në përputhje me pikën 2, shkronjën “b” dhe “c” të këtij neni, dispozitat e nenit 66, pika 3 të këtij ligji do të zbatohen për aq sa është e mundur.

14. Përdorimi i Portofolave është vullnetar. Aksesit në shërbimet publike dhe private, në tregun e punës dhe liria për të kryer biznes nuk kufizohet në asnjë mënyrë apo të bëhen të pafavorshme për personat fizikë ose juridikë që nuk përdorin Portofola. Aksesit në shërbimet publike dhe private do të vijoj të bëhet me mjete të tjera ekzistuese identifikimi dhe autentifikimi.

15. Kriteret teknike të Portofolit janë si vijon:

a) nuk lejojnë ofruesit e vërtetimeve elektronike të attributeve ose ndonjë palë tjetër, pas lëshimit të vërtetimit të attributeve, të marrin të dhëna që lejojnë gjurmimin e transaksioneve ose sjelljes së përdoruesit, lidhjen ose ndërlidhjen e tyre, ose njohuritë e transaksioneve ose sjelljen e përdoruesit me mënyra të tjera, përveçse kur autorizohet nga përdoruesi;

b) bëjnë të mundur teknikisht ruajtjen e privatësisë kur ka mospëlqim, ku vërtetimi i attributeve nuk kërkon identifikimin e përdoruesit.

16. Çdo përpunim i të dhënave personale i kryer nga ofruesi i Portofolave ose në emër të tyre nga organet ose palët përgjegjëse, për ofrimin e Portofolit si mjet i identifikimit elektronik kryhet sipas legjislacionit në fuqi për mbrojtjen e të dhënave personale.

17. Me anëtarësimin në Bashkimin Evropian, Republika e Shqipërisë njofton Komisionin Evropian lidhur me:

a) organin përgjegjës për krijimin dhe mbajtjen e listës së palëve të përfshira të regjistruara që mbështeten në Portofol në përputhje me pikën 5 të nenit 8 të këtij ligji dhe vendndodhjen e asaj listë;

b) organet përgjegjëse për ofrimin e portofolit në përputhje me pikën 1 të këtij neni.

c) organet përgjegjëse që sigurojnë që të dhënat e identifikimit të personit janë të lidhura me Portofolin në përputhje me pikën 4, shkronjën “dh” të këtij neni;

ç) mekanizmin që lejon vërtetimin e të dhënave të identifikimit të personit të përmendura në pikën 4, shkronja “dh” të këtij neni dhe të identitetit të palëve të përfshira;

d) mekanizmin me anë të të cilit vërtetohet vërtetësia dhe vlefshmëria e Portofolit.

18. Përcaktimet e nenit 12 të këtij ligji zbatohen për aq sa është e mundur pa rënë ndesh me përcaktimet e pikës 22 të këtij neni.

19. Përcaktimet në pikat “b”, “ç”, “d”, “dh” “e” “ë”, “f”, “g” të pikës 5 të nenit 32 të këtij ligji zbatohen për aq sa është e mundur edhe për ofruesit e Portofolave.

20. Portofolat bëhen të aksesueshme për përdorim, nga personat me aftësi të kufizuara, njëlloj me përdoruesit e tjerë, në përputhje me legjislacionit në fuqi për përfshirjen dhe aksesueshmërinë e personave me aftësi të kufizuara.

21. Përcaktimet e bëra në nenet 14, 16, 17, 20 dhe 21 të këtij ligji nuk do të zbatohen për ofrimin e Portofolave dhe skemave të identifikimit elektronik.

22. Këshilli i Ministrave brenda 24 muajve nga hyrja në fuqi e këtij ligji miraton standardet e referencës, dhe kur është e nevojshme specifikimet dhe procedurat që do të përdoren për Portofolin, sipas përcaktimeve të pikave 3, 4, 7, 17 në përputhje me aktet e miratuara nga Komisioni Evropian.

23. Autoriteti, brenda 24 muajve nga hyrja në fuqi e këtij ligji miraton me urdhër të Drejtorit të Përgjithshëm standardet e referencës dhe, kur është e nevojshme, përcakton specifikimet dhe procedurat për të lehtësuar regjistrimin e përdoruesve në Portofol qoftë përmes mjeteve të identifikimit elektronik që përmbushin nivelin e lartë të sigurisë, ose përmes mjeteve të identifikimit elektronik me nivel të konsiderueshëm sigurie, të kombinuara me procedura shtesë të regjistrimit në distancë, të cilat së bashku përmbushin kërkesat për nivelin e lartë të sigurimit.

## **Neni 8**

### **Palët e përfshira në Portofolin e Identitetit Digjital**

1. Kur një palë që mbështetet në Portofol synon të ofrojë shërbime publike ose private të portofolit me anë të ndërveprimit digjital, pala e përfshirë duhet të regjistrohet në autoritetin përgjegjës.
2. Procesi i regjistrimit është me kosto efektive dhe proporcional me rrezikun. Pala e përfshirë siguron të paktën:
  - a) informacionin e nevojshëm për t'u autentifikuar në portofol, i cili minimalisht përfshin:
    - i. selinë në të cilin është e vendosur pala; dhe
    - ii. emrin dhe, kur është e zbatueshme, numrin e regjistrimit siç është deklaruar në një procesverbal zyrtar së bashku me të dhënat identifikuese të atij procesverbali zyrtar;
  - b) detajet e kontaktit të palës së përfshirë;
  - c) përdorimin e Portofolave, duke përfshirë një tregues të të dhënave që do të kërkohen nga pala për përdoruesin.
3. Palët e përfshira nuk mund t'i kërkojnë përdoruesve të japin ndonjë të dhënë tjetër përveç atyre të përcaktuara në pikën 2, shkronja "c" e këtij neni.
4. Përcaktimet e bëra në pikat 1 dhe 2 të këtij neni do të zbatohen edhe për ofrimin e shërbimeve specifike.
5. Autoriteti publikon informacionin sipas pikës 2 të këtij neni, në formë të nënshkruar ose të vulosur në mënyrë elektronike të përshtatshme për përpunim të automatizuar.
6. Palët e përfshira të regjistruara në përputhje me këtë nen informojnë Autoritetin përgjegjës për çdo ndryshim në informacionin e dhënë sipas përcaktimeve në pikën 2 të këtij neni.
7. Autoriteti siguron një mekanizëm të përbashkët për të lejuar identifikimin dhe vërtetimin e palëve të përfshira, siç përmendet në nenin 7 pika 4, shkronja "c" e këtij ligji.
8. Kur palët e përfshira synojnë të njihen në Portofol, ato duhet të identifikohen te përdoruesi.
9. Palët e përfshira janë përgjegjëse për kryerjen e procedurës për autentifikimin dhe vërtetimin e të dhënave të identifikimit të personit dhe vërtetimin elektronik të attributeve të kërkuara nga Portofoli. Palët e përfshira nuk refuzojnë përdorimin e pseudonimeve, kur nuk kërkohet identifikimi i përdoruesit.
10. Personat e autorizuar që veprojnë në emër të palëve të përfshira konsiderohen si palë të përfshira dhe nuk ruajnë të dhëna për përmbajtjen e transaksionit.
11. Autoriteti brenda 24 muajve nga hyrja në fuqi e këtij ligji, miraton me urdhër të Drejtorit të Përgjithshëm specifikimet teknike dhe procedurat për kërkesat e përcaktuara në pikat 2,5,6 dhe 9 të këtij neni në përputhje me aktet e përcaktuara në nenin 7 pika 23 të këtij ligji në përputhje me përcaktimet e nxjerra nga Komisioni Evropian.

## **Neni 9**

### **Certifikimi i Portofolave të Identitetit Digjital**

1. Konformiteti i Portofolave dhe skema e identifikimit elektronik certifikohen nga organi i vlerësimit të konformitetit, sipas kërkesave të përcaktuara në nenin 7 pika 4, 5, 8, 14 të këtij ligji dhe kur është e zbatueshme me standardet dhe specifikimet teknike të përcaktuara në pikën 23 të nenit 7 të këtij ligji.
2. Certifikimi i konformitetit të Portofolave me kërkesat e referuara në pikën 1 të këtij neni, ose pjesëve të tyre, që janë të rëndësishme për sigurinë kibernetike, kryhet në përputhje me përcaktimet e bëra në kuadrin ligjor në fuqi për sigurinë kibernetike lidhur me skemat e certifikimit të sigurisë kibernetike.
3. Për kërkesat e përmendura në pikën 1 të këtij neni që lidhen ose jo me sigurinë kibernetike, sipas skemës së certifikimit të sigurisë kibernetike të përmendur në pikën 2 të këtij neni e cila nuk mbulon, ose mbulon vetëm pjesërisht këto kërkesa të sigurisë kibernetike, për këto kërkesa, Shqipëria do të krijojë skema kombëtare të certifikimit duke zbatuar kërkesat e përcaktuara në pikën 6 të këtij neni. Me anëtarësimin në BE, Autoriteti do të paraqesë projekt-skemën kombëtare të certifikimit Grupit Evropian të Bashkëpunimit të Identitetit Digjital.
4. Certifikimi sipas pikës 1 të këtij neni është i vlefshëm për një periudhë deri në pesë vjet, me kusht që një vlerësim i vulnerabilitetit të kryhet çdo dy vite. Në rastin kur një vulnerabilitet identifikohet dhe nuk korrigjohet në kohën e duhur, certifikimi anulohet.
5. Pajtueshmëria me kërkesat e përcaktuara në nenin 6 të këtij ligji në lidhje me përpunimin e të dhënave personale do të kryhet në përputhje me legjislacionin në fuqi për mbrojtjen e të dhënave personale.
6. Autoriteti brenda 24 muajve nga hyrja në fuqi e këtij ligji, në zbatim të pikave 1, 2 dhe 3 të këtij neni miraton me urdhër të Drejtorit të Përgjithshëm standardet e referencave si dhe specifikimet, procedurat për certifikimin e Portofolave sipas përcaktimeve të nxjerra nga Komisioni Evropian.
7. Autoriteti publikon në faqen zyrtare të tij emrat dhe adresat e organeve të vlerësimit të konformitetit të përmendura në pikën 1 të këtij neni.
8. Autoriteti brenda 24 muajve nga hyrja në fuqi e këtij ligji përcakton kriteret specifike që duhet të përmbushen nga organet e vlerësimit të konformitetit të përmendura në pikën 1 të këtij neni.

## **Neni 10**

### **Publikimi i listës të Portofolave të identitetit Digjital të certifikuar**

1. Me anëtarësimin e Republikës së Shqipërisë në Bashkimin Evropian Autoriteti informon Komisionin dhe Grupin Evropian të Bashkëpunimit të Identitetit Digjital sipas përcaktimeve të nenit 76 të këtij ligji, menjëherë për Portofolat që janë siguruar në përputhje me nenin 7 të këtij ligji dhe janë të certifikuar nga organet e vlerësimit të konformitetit të përmendura në pikën 1 të nenit 9 të këtij ligji, si dhe rastet e anulimit të një certifikimi dhe arsytet e anulimit. Lista e Portofolave të certifikuar publikohet në faqen zyrtare të Autoritetit.
2. Përveç rasteve të parashikuara në nenin 7, pika 17 të këtij ligji, informacioni i ofruar nga Republika e Shqipërisë sipas pikës 1 të këtij neni përfshin të paktën:

- a) certifikatën dhe raportin e vlerësimit të certifikimit të portofolit;
- b) një përshkrim të skemës së identifikimit elektronik sipas së cilës ofrohet Portofoli;
- c) institucionin përgjegjës për portofolin si dhe detyrimet për palën që ofron Portofolin;
- ç) autoriteti ose autoritetet përgjegjëse për skemën e identifikimit elektronik;
- d) marrëveshjet për pezullimin ose anulimin e skemës së identifikimit elektronik ose të autentifikimit ose të pjesëve të kompromentuara në fjalë.

3. Autoriteti krijon dhe mban elektronikisht një listë të Portofolave të certifikuar dhe i publikon në faqen zyrtare të tij.

## **Neni 11**

### **Shkelja e sigurisë së Portofolave të Identitetit Digjital**

1. Kur për Portofolat e parashikuar në përputhje me nenin 7 të këtij ligji, mekanizmat e vlefshmërisë të përmendura në nenin 7, pika 7 ose skemën e identifikimit elektronik sipas së cilës ofrohen janë shkelur ose kompromentuar pjesërisht në një mënyrë që ndikon në besueshmërinë e tyre ose besueshmërinë e Portofolave të tjera të identitetit digjital, Autoriteti pezullon menjëherë dhënien dhe përdorimin e tyre. Në varësi të shkallës së shkeljes së sigurisë ose kompromentimit të përmendur në këtë pikë, Autoriteti tërheq menjëherë Portofolin. Autoriteti informon përdoruesit e prekur, palët e përfshira, pikën e vetme të kontaktit të përcaktuar në përputhje me nenin 74, pika 1 të këtij ligji.
2. Kur shkelja e sigurisë ose kompromentimi i përmendur në pikën 1 të këtij neni nuk korrigjohet brenda tre muajve nga pezullimi, Autoriteti tërheq Portofolin dhe anulon vlefshmërinë e tij. Autoriteti informon përdoruesit e prekur palët e treta, pikën e vetme të kontaktit të përcaktuar në përputhje me nenin 74, pika 1 të këtij ligji.
3. Kur shkelja e sigurisë ose komprometimi i përmendur në pikën 1 të këtij neni korrigjohet, Autoriteti siguron rikthimin dhe përdorimin e Portofolit dhe informon menjëherë përdoruesit e prekur, palët e përfshira, pikën e vetme të kontaktit të përcaktuar në nenin 74, pika 1 të këtij ligji.
4. Autoriteti publikon në faqen zyrtare të tij listën e përmendur në nenin 10 të këtij ligji.
5. Autoriteti brenda 24 muajve nga hyrja në fuqi e këtij ligji nxjerr një listë të standardeve të referencës dhe përcakton procedurat për masat e përmendura në paragrafët 1, 2 dhe 3 të këtij neni në përputhje me aktet e nxjerra nga Komisioni Evropian.

## **Neni 12**

### **Ndërveprimi i Portofolave të Identitetit Digjital**

1. Për të aksesuar një shërbim online të ofruar nga një organ i sektorit publik kur kërkohet identifikim dhe vërtetim elektronik për të aksesuar këtë shërbim pranohen gjithashtu edhe Portofolat që ofrohen në përputhje me përcaktimet e këtij ligji.
2. Kur palëve të përfshira private që ofrojnë shërbime, me përjashtim të mikrondërmarrjeve dhe ndërmarrjeve të vogla sipas përcaktimeve në kuadrin ligjor në fuqi për ndërmarrjet mikro, të vogla

dhe të mesme, u kërkohet nga ligji të përdorin autentifikim të përdoruesit për identifikimin online ose kur kërkohet autentifikim i nivelit të lartë të përdoruesit për identifikimin online që rrjedh nga detyrimet kontraktuale, duke përfshirë fushat e transportit, energjisë, bankave, shërbimeve financiare, sigurimeve shoqërore, shëndetësisë, ujit të pijshëm, shërbimeve postare, infrastrukturës digjitale, arsimit ose telekomunikacionit, këto palë të përfshira private, jo më vonë se 36 muaj nga data e hyrjes në fuqi të akteve të përmendura në nenin 7 dhe nenin 9 pika 6 të këtij ligji dhe vetëm me kërkesën vullnetare të përdoruesit zbatojnë Portofolat që ofrohen në përputhje me përcaktimet e këtij ligji.

3. Kur ofruesit e platformave online të mëdha kërkojnë vërtetimin e përdoruesit për akses në shërbimet online, ata gjithashtu pranojnë dhe lehtësojnë përdorimin e Portofolave që ofrohen në përputhje me përcaktimet e këtij ligji për autentifikimin e përdoruesit vetëm me kërkesë vullnetare të përdoruesit dhe lidhur me të dhënat minimale të nevojshme për shërbimin specifik online për të cilin kërkohet autentifikimi.

4. Brenda 24 muajve pas vendosjes së Portofolave, Autoriteti bën një vlerësim të kërkesave, disponimit dhe përdorimit të Portofolave, duke marrë parasysh kritere të tilla si pranimi i përdoruesit, prania ndërkufitare e ofruesit të shërbimeve, zhvillimet teknologjike, evolucioni në modelet e përdorimit dhe kërkesa e konsumatorëve.

## **KREU II**

### **IDENTIFIKIMI ELEKTRONIK**

#### **Neni 13**

##### **Njohja reciproke**

1. Skemat e identifikimit elektronik dhe shërbimet e besuara, njihen dhe zbatohen në përputhje me marrëveshjet e ratifikuara nga Republika e Shqipërisë, për pranimin e tyre dhe shkëmbimin e të dhënave në përputhje me legjislacionin në fuqi për mbrojtjen e të dhënave personale.

2. Ofruesit e Kualifikuar të Shërbimeve të Besuara, të cilët operojnë në vendet anëtare të Bashkimit Evropian dhe janë të akredituar nga Autoriteti mbikëqyrës përkatës, identifikimet dhe shërbimet e besuara të lëshuara prej tyre, kanë të njëjtën vlefshmëri ligjore dhe fuqi provuese, si ato të lëshuara nga një Ofrues i Kualifikuar i Shërbimit të Besuar, që operon në Republikën e Shqipërisë.

3. Për qëllim të pikës 1 të këtij neni, njohja reciproke plotëson kushtet e mëposhtme:

a) mjeti i identifikimit elektronik lëshohet sipas një skeme identifikimi elektronik që përfshihet në listën e publikuar nga autoritetet përkatëse të shteteve.

b) niveli i sigurisë së mjetit të identifikimit elektronik korrespondon me një nivel sigurie të barabartë ose më të lartë se niveli i sigurisë që kërkohet nga organi përkatës i sektorit publik për të aksesuar atë shërbim online në shtetin tjetër, me kusht që niveli i sigurisë së atij mjeti identifikimi elektronik të korrespondojë me një nivel të konsiderueshëm ose të lartë sigurie;

c) organi përkatës i sektorit publik përdor nivelin e sigurisë të konsiderueshëm ose të lartë në lidhje me aksesin në atë shërbim online.

4. Një mjet identifikimi elektronik që lëshohet sipas një skeme identifikimi elektronik të përfshirë në listën e publikuar nga autoritetet përgjegjëse/ Komisioni Evropian dhe që korrespondon me nivelin e ulët të sigurisë mund të njihet nga organet e sektorit publik për qëllime të autentifikimit ndërkufitar për shërbimin e ofruar online nga këto organe.

## **Neni 14**

### **Njoftimi i skemave të identifikimit elektronik**

1. Një skemë identifikimi elektronik do të jetë e ligjshme për njoftim sipas nenit 16 pika 1 të këtij ligji, me kusht plotësimin e kërkesave të mëposhtme:

a) mjetet e identifikimit elektronik nën skemën e identifikimit elektronik mund të përdoren për të hyrë të paktën në një shërbim elektronik të ofruar nga një organ i sektorit publik, që kërkon identifikim elektronik;

b) skema e identifikimit elektronik dhe mjetet e identifikimit elektronik të lëshuara sipas kësaj skeme, duhet të përmbushin kërkesat për nivelin më të lartë të sigurisë sipas përcaktimeve të bëra në nenin 15 të këtij ligji;

c) skema e identifikimit elektronik e publikuar, siguron që të dhënat e identifikimit personal të përfaqësojnë në mënyrë unike një person fizik ose juridik, në përputhje me specifikimet teknike, standardet dhe procedurat sipas nivelit të sigurisë të përcaktuar në nenin 15, pika 3 të këtij ligji, në momentin e lëshimit të mjetit të identifikimit elektronik;

ç) pala që lëshon mjetet e identifikimit elektronik sipas kësaj skeme siguron të dhëna identifikuese brenda mjeteve të identifikimit elektronik që korrespondojnë me personin të cilit i janë lëshuar mjetet në përputhje me specifikimet teknike, standardet dhe procedurat për nivelin përkatës të sigurisë të përcaktuar në nenin 15 pika 3 të këtij ligji;

d) të sigurojë disponueshmërinë e autentifikimit online, në mënyrë që çdo palë e përfshirë të jetë në gjendje të konfirmojë të dhënat e identitetit të personit, të marra në formë elektronike.

2. Për palët e përfshira, përveç organeve të sektorit publik, duhet të përcaktohen kushtet e aksesit për autentifikim. Mbi këto palë nuk duhet të imponohen kërkesa specifike teknike jo proporcionale të cilat parandalojnë ose pengojnë në mënyrë të konsiderueshme ndërveprimin e skemave të identifikimit elektronik.

3. Autentifikimi ndër-kufitar sigurohet pa pagesë kur përdoret për një shërbim elektronik të ofruar nga një organ i sektorit publik.

## **Neni 15**

### **Nivelet e sigurisë së skemave të identifikimit elektronik**

1. Skema e identifikimit elektronik sipas përcaktimeve të nenit 16, pikës 1 të këtij ligji do të sigurojë nivelet e sigurisë të ulët, konsiderueshëm dhe/ose të lartë për mjetet e identifikimit elektronik të lëshuara sipas kësaj skeme.

2. Nivelet e sigurisë të ulët, konsiderueshëm dhe të lartë plotësojnë kriteret e mëposhtme:

a) niveli i ulët i sigurisë, i referohet një mjeti identifikimi elektronik në kontekstin e një skeme identifikimi elektronik, i cili siguron një shkallë të kufizuar të besueshmërisë në identitetin e pretenduar ose të pohuar të një personi dhe karakterizohet duke iu referuar specifikimeve teknike, standardeve dhe procedurave që lidhen me to, duke përfshirë kontrollet teknike, qëllimi i të cilave është zvogëlimi i rrezikut të keqpërdorimit ose ndryshimit të identitetit;

b) niveli i sigurisë i konsiderueshëm, i referohet një mjeti identifikimi elektronik në kontekstin e një skeme identifikimi elektronik, i cili siguron një shkallë të konsiderueshme besueshmërie në identitetin e pretenduar ose të pohuar të një personi dhe karakterizohet duke iu referuar specifikimeve teknike, standardeve dhe procedurave që lidhen me to, duke përfshirë kontrollet teknike, qëllimi i të cilave është të ulin ndjeshëm rrezikun e keqpërdorimit ose ndryshimit të identitetit;

c) niveli i lartë i sigurisë, i referohet një mjeti identifikimi elektronik në kontekstin e një skeme identifikimi elektronik, i cili siguron një shkallë më të lartë besueshmërie në identitetin e pretenduar ose të pohuar të një personi sesa mjetet e identifikimit elektronik me nivelin e konsiderueshëm të sigurisë, dhe karakterizohet duke iu referuar specifikimeve teknike, standardeve dhe procedurave që lidhen me to, duke përfshirë kontrollet teknike, qëllimi i të cilave është të parandalojnë keqpërdorimin ose ndryshimin e identitetit.

3. Autoriteti brenda 24 muajve nga hyrja në fuqi e këtij ligji, përcakton me urdhër të Drejtorit të Përgjithshëm specifikimet minimale teknike, standardet dhe procedurat në lidhje me të cilat nivelet e sigurisë të ulëta, të konsiderueshëm dhe të larta janë specifikuar për mjetet elektronike të identifikimit elektronik duke marrë në konsideratë elementët e mëposhtëm:

a) procedurën për të vërtetuar dhe verifikuar identitetin e personave fizikë ose juridikë që aplikojnë për lëshimin e mjeteve të identifikimit elektronik;

b) procedurën për lëshimin e mjetit të identifikimit elektronik të kërkuar;

c) mekanizmin e autentifikimit, nëpërmjet të cilit personi fizik ose juridik përdor mjetet e identifikimit elektronik për të konfirmuar identitetin e tij tek një palë e përfshirë;

ç) subjekti që lëshon mjetin e identifikimit elektronik;

d) çdo organ tjetër të përfshirë në aplikimin për lëshimin e mjeteve të identifikimit elektronike;

dh) specifikimet teknike dhe të sigurisë të mjeteve të identifikimit elektronik të lëshuara.

## **Neni 16**

### **Njoftimi**

1. Autoriteti publikon në faqen zyrtare të tij skemat e identifikimit elektronik me informacionin si vijon:

- a) një përshkrim të skemës së identifikimit elektronik, duke përfshirë nivelet e sigurisë dhe lëshuesin e mjeteve të identifikimit elektronik sipas skemës;
  - b) institucionin përgjegjës dhe mbikëqyrës si dhe informacionin në lidhje me fushën e përgjegjësisë si më poshtë vijon:
    - i) palën që lëshon mjetin e identifikimit elektronik;
    - ii) palën që operon procedurën e autentifikimit.
  - c) subjektin ose subjektet që menaxhojnë regjistrimin e të dhënave unike të identifikimit të personit;
  - ç) një përshkrim mbi përmbushjen e kërkesave të përcaktuara në pikën 4 të nenit 20, të këtij ligji;
  - d) një përshkrim të autentifikimit të përmendur në shkronjën “d”, pika 1, pikën 2 dhe 3 të nenit 14 të këtij ligji;
  - dh) përcaktimet mbi pezullimin ose anulimin e skemës së identifikimit elektronik ose të autentifikimit ose të pjesëve të komprometuara.
2. Autoriteti në rast ndryshimesh të ndodhura në skemat apo informacionin e përmendur në pikën 1 të këtij neni bën përditësimin e saj sa herë që është e nevojshme.
3. Autoriteti përcakton formatin e publikimit të informacionit mbi skemën e identifikimit elektronik sipas pikës 1 të këtij neni.

## **Neni 17**

### **Shkeljet e sigurisë në skemat e identifikimit elektronik**

1. Kur skema e identifikimit elektronik sipas përcaktimeve të nenit 16 pika 1 të këtij ligji ose autentifikimi i përmendur në nenin 14 pika 1, shkronja “d”, pika 2 dhe 3 të këtij ligji është shkelur ose komprometuar pjesërisht në një mënyrë që ndikon në besueshmërinë e autentifikimit të skemës, Autoriteti pezullon ose anulon pa vonesë atë autentifikim ose pjesët e komprometuara të skemës.
2. Kur shkelja ose kompromentimi i përmendur në pikën 1 të këtij neni korrigjohet, Autoriteti rikthen skemën dhe autentifikimin sipas asaj skeme.
3. Nëse shkelja ose kompromentimi i përmendur në pikën 1 të këtij neni nuk korrigjohet brenda tre muajve nga pezullimi ose anulimi, Autoriteti njofton tërheqjen e skemës së identifikimit elektronik.

## **Neni 18**

### **Përgjegjësia**

1. Republika e Shqipërisë si shtet njoftues do të jetë përgjegjës për dëmin e shkaktuar me dashje ose nga pakujdesia çdo personi fizik ose juridik për shkak të mos përmbushjes së detyrimeve sipas pikës 1, shkronjës “c” dhe “d”, pikës 2 dhe 3 të nenit 14 të këtij ligji në një transaksion ndërkufit
2. Pala që lëshon mjetin elektronik të identifikimit do të jetë përgjegjëse për dëmin e shkaktuar me dashje ose nga pakujdesia çdo personi fizik ose juridik për shkak të mos përmbushjes së detyrimit të përmendur në shkronjën “ç”, të pikës 1, të nenit 14 të këtij ligji.

3. Pala që operon procedurën e autentifikimit do të jetë përgjegjëse për dëmin e shkaktuar me dashje ose nga pakujdesia çdo personi fizik ose juridik për shkak të mos përmbushjes së sigurimit të funksionimit të saktë të vërtetimit të përmendur në nenin 14, pika 1, shkronja “d”, pika 2 dhe 3 të këtij ligji.

## **Neni 19**

### **Përputhja e identitetit ndërkufitar**

1. Kur pala e përfshirë vepron si ofrues për shërbimet ndërkufitare, duhet të sigurojë një përputhje të qartë të identitetit për personat fizikë që përdorin mjete identifikimi elektronik ose Portofola.
2. Autoriteti përcakton masa teknike dhe organizative për të siguruar një nivel të lartë mbrojtjeje të të dhënave personale të përdorura për përputhjen e identitetit dhe për të parandaluar profilizimin e përdoruesve.
3. Autoriteti brenda 24 muajve nga hyrja në fuqi e këtij ligji, me urdhër të Drejtorit të Përgjithshëm miraton një listë të standardeve të referencës si dhe përcakton specifikimet, procedurat për kërkesat e përmendura në pikën 1 të këtij neni, në përputhje me përcaktimet e nxjerra nga Komisioni Evropian.

## **Neni 20**

### **Ndërveprimi**

1. Në rastin e njohjes reciproke skema kombëtare e identifikimit elektronik e njoftuar sipas nenit 16 pika 1 të këtij neni ndërvepron me skemat e tjera.
2. Për qëllimet e pikës 1 të këtij neni, krijohet një kuadër ndërveprimi.
3. Kuadri i ndërveprimit plotëson kriteret e mëposhtme:
  - a) synon të jetë neutral ndaj teknologjisë së përdorur dhe nuk bën dallime mes zgjidhjeve specifike teknike kombëtare për identifikimin elektronik;
  - b) ndjek standardet evropiane dhe ndërkombëtare, për aq sa është e mundur;
  - c) lehtëson zbatimin e privatësisë dhe sigurisë që në projektim.
4. Kuadri i ndërveprimit përbëhet nga:
  - a) një referencë për kërkesat minimale teknike në lidhje me nivelet e sigurisë sipas përcaktimeve të nenit 15 të këtij ligji;
  - b) një kornizë të niveleve kombëtare të sigurisë së skemave të identifikimit elektronik sipas përcaktimeve të nenit 15 të këtij ligji;
  - c) një referencë për kërkesat minimale teknike për ndërveprim;
  - ç) një referencë për një grup minimal të të dhënave për identifikimin e personit të nevojshme për të përfaqësuar në mënyrë unike një person fizik ose juridik, ose një person fizik që përfaqëson një person tjetër fizik ose një person juridik, të cilat janë të disponueshme nëpërmjet skemave të identifikimit elektronik;
  - d) rregullat e procedurës;

dh) mekanizmat për zgjidhjen e mosmarrëveshjeve;

e) standardet e përbashkëta të sigurisë operacionale.

5. Autoriteti 24 muaj pas hyrjes në fuqi të këtij ligji me urdhër të Drejtorit të Përgjithshëm miraton aktet zbatuese për kuadrin e ndërveprimit sipas përcaktimeve në pikën 4 të këtij neni në përputhje me përcaktimet e nxjerra nga Komisioni Evropian.

## **Neni 21**

### **Certifikimi i skemave të identifikimit elektronik**

1. Konformiteti i skemave të identifikimit elektronik në përputhje me kërkesat e sigurisë kibernetike të përcaktuara në këtë ligj, përfshirë kërkesat përkatëse të sigurisë kibernetike të përcaktuara në nenin 15, pika 2 të këtij ligji në lidhje me nivelet e sigurisë së skemave të identifikimit elektronik, certifikohen nga organet e vlerësimit të konformitetit të akredituara në Republikën e Shqipërisë ose vendet anëtare të BE-së.
2. Certifikimi sipas pikës 1 të këtij neni kryhet në bazë të skemës kombëtare të certifikimit të sigurisë kibernetike, për aq sa certifikata e sigurisë kibernetike ose pjesë të saj mbulojnë këto kërkesa të sigurisë kibernetike.
3. Certifikimi në bazë të pikës 1 të këtij neni është i vlefshëm deri në pesë vjet, me kusht që një vlerësim i vulnerabilitetit të kryhet çdo dy vjet. Kur një vulnerabilitet identifikohet dhe nuk korrigjohet brenda tre muajve nga një identifikim i tillë, certifikimi anulohet.
4. Pavarësisht përcaktimeve të pikës 2 të këtij neni Autoriteti mund të kërkojë informacione shtesë nga autoriteti përgjegjës njoftues i skemave të identifikimit elektronik ose një pjesë të tyre të certifikuar.

## **Neni 22**

### **Aksesi në karakteristikat e *hardware* dhe *software***

1. Në rast se ofruesit e Portofolave dhe lëshuesit e mjeteve të identifikimit elektronik të njoftuara, përdorin shërbime të platformës bërthamë sipas përcaktimeve të pikës 50 të nenit 3 këtij ligji për qëllime tregtare ose profesionale, për ofrimin e shërbimeve të portofolit për përdoruesit fundorë në kuptim të pikës 38 të nenit 3, ato kanë të drejtë aksesi në të njëjtin sistem operativ hardware ose software të kontrolluesit të aksesit (*gatekeepers*).
2. Aksesi i ofruar duhet të jetë efektiv dhe pa pagesë, pavarësisht nëse karakteristikat e hardware ose software janë pjesë e sistemit operativ, të disponueshme ose përdoren nga kontrolluesi i aksesit (*gatekeeper*) kur ofron shërbime të tilla. Ky nen nuk duhet të cenojë përcaktimet e pikës 13 të nenit 7 të këtij ligji.

## **KREU III**

### **SHËRBIMET E BESUARA**

## **SEKSIONI 1**

### **DISPOZITAT E PËRGJITHSHME**

#### **Neni 23**

##### **Përgjegjësia dhe barra e provës**

1. Pavarësisht përcaktimeve të pikës 2 të këtij neni dhe pa rënë ndesh me përcaktimet e legjislacionit në fuqi për mbrojtjen e të dhënave personale, ofruesit e shërbimeve të besuara do të jenë përgjegjës për dëmin e shkaktuar me qëllim ose nga pakujdesia ndaj çdo personi fizik ose juridik për shkak të mos përmbushjes së detyrimeve sipas përcaktimeve të këtij ligji. Çdo person fizik ose juridik i cili ka pësuar dëme materiale ose jo materiale si rezultat i shkeljeve të përcaktimeve të bëra në këtë ligj nga ofruesi i shërbimit të besuar, ka të drejtë të kërkojë dëmshpërblim në përputhje me përcaktimet e legjislacionit në fuqi.
2. Barra e provës për të vërtetuar dashjen apo pakujdesinë për dëmin e shkaktuar nga një ofrues i pakualifikuar i shërbimit të besuar i ngarkohet personit fizik ose juridik që pretendon dëmin e përmendur më lart.
3. Dashja apo pakujdesia e një ofruesi të kualifikuar të shërbimit të besuar prezumohet në të gjitha rastet me përjashtim kur ai ofrues i kualifikuar i shërbimit të besuar provon se dëmi i përmendur si më lart ka ndodhur pa fajin e tij.
4. Ofruesit e shërbimeve të besuara informojnë me shkrim paraprakisht klientët e tyre lidhur me kufizimet e përdorimit të shërbimeve që ofrojnë, edhe kur këto kufizime janë të njohura gjithashtu nga palë të tretë. Ofruesit e shërbimeve të besuara nuk mbajnë përgjegjësi për dëmet që shkatojnë nga përdorimi i shërbimeve që tejkalojnë kufizimet e bëra të njohura.
5. Përcaktimet e bëra në pikat 1, 2, 3 dhe 4 të këtij neni do të zbatohen në përputhje me përcaktimet në legjislacionin në fuqi në lidhje me përgjegjësinë e dëmit.

#### **Neni 24**

##### **Shërbimet e besuara në aspektin ndërkombëtar**

1. Shërbimet e besuara të ofruara nga ofruesit e shërbimeve të besuara, që janë themeluar në një vend të tretë ose nga një organizatë ndërkombëtare njihen si ligjërish ekuivalente me shërbimet e besuara të kualifikuara të ofruara nga ofrues të kualifikuar të shërbimeve të besuara të vendosura në BE, ku shërbimet e besuara me origjinë nga vendi i tretë ose nga organizatat ndërkombëtare njihen me anë të akteve nënligjore ose një marrëveshjeje të lidhur ndërmjet BE-së dhe vendit të tretë ose organizatës ndërkombëtare.
2. Aktet nënligjore dhe marrëveshja e përmendur në pikën 1 të këtij neni sigurojnë që kërkesat e zbatueshme për ofruesit e kualifikuar të shërbimit të besuar të vendosura në BE dhe shërbimet e kualifikuara të besuara që ata ofrojnë përmbushen nga ofruesit e shërbimeve të besuara në vendin

e tretë ose nga organizata ndërkombëtare. Vendet e treta dhe organizatat ndërkombëtare në veçanti krijojnë, mbajnë dhe publikojnë një listë të besuar të ofruesve të njohur të shërbimeve të besuara.

3. Marrëveshja e përmendur në pikën 1 të këtij neni siguron që shërbimet e besuara të kualifikuara të ofruara nga ofrues i kualifikuar i shërbimit të besuara që operojnë në Republikën e Shqipërisë njihen ligjërisht ekuivalente me shërbimet e besuara të ofruara nga ofruesit e shërbimeve të besuara në shtetin jashtë BE ose nga organizata ndërkombëtare me të cilën është lidhur marrëveshja.

## **Neni 25**

### **Akresi për personat me aftësi të kufizuara dhe nevoja të veçanta**

Përdorimi i mjeteve të identifikimit elektronik, shërbimeve të besuara dhe produkteve të përdoruesit fundor, që përdoren në ofrimin e këtyre shërbimeve duhet të bëhet i mundur në gjuhë të thjeshtë dhe të kuptueshme, në përputhje me legjislacionin në fuqi për përfshirjen dhe aksesueshmërinë e personave me aftësi të kufizuara, duke përfshirë edhe personat me nevoja të veçanta si të moshuarit dhe personat me akses të kufizuar në teknologjitë digjitale.

## **SEKSIONI 2**

### **SHËRBIME TE BESUARA JO TË KUALIFIKUARA**

## **Neni 26**

### **Kërkesat për t'u përmbushur nga ofruesit e shërbimeve të besuara**

1. Ofruesit e shërbimeve të besuara të kualifikuar dhe jo të kualifikuar marrin masat e duhura teknike dhe organizative për menaxhimin e risqeve të shfaqura të sigurisë së shërbimeve të besuara që ata ofrojnë. Këto masa sigurojnë që niveli i sigurisë është në përputhje me shkallën e riskut, duke marrë parasysh zhvillimet më të fundit teknologjike. Në veçanti, ofruesit e shërbimeve të besuara marrin masa për të parandaluar dhe minimizuar ndikimin e incidenteve të sigurisë si dhe për informimin e palëve të interesuara mbi efektet e shkaktuara nga incidente të tilla.
2. Menjëherë dhe në çdo rast brenda 24 orëve nga marrja dijeni, sipas pikës 1 të këtij neni, ofruesit e kualifikuar dhe jo të kualifikuar të shërbimeve të besuara, njoftojnë Autoritetin dhe kur është e nevojshme autoritetin përgjegjës për mbrojtjen e të dhënave personale, për çdo shkelje të sigurisë ose humbje të integritetit që ka një ndikim të rëndësishëm në shërbimin e besuar të ofruar ose në të dhënat personale.
3. Kur shkelja e sigurisë ose humbja e integritetit ka një ndikim negativ në një person fizik ose juridik të cilit i është ofruar shërbimi i besuar, ofruesi i shërbimit të besuar njofton menjëherë këtë të fundit mbi shkeljen e sigurisë ose humbjen e integritetit.
4. Nëse një shkelje e sigurisë ose humbja e integritetit ka të bëjë me dy ose më shumë shtete, Autoriteti informon autoritetet mbikëqyrëse në shtetet e tjera respektive dhe ENISA-n.

5. Autoriteti informon publikun ose i kërkon ofruesit të shërbimit të besuar për ta bërë këtë, kur vendos se publikimi i informacionit të shkeljes së sigurisë ose humbja e integritetit është në interes të publikut.

6. Me anëtarësimin e Republikës së Shqipërisë në BE, Autoriteti dërgon çdo vit pranë ENISA-s një përmbledhje të njoftimeve për shkeljen e sigurisë dhe humbjen e integritetit të marra nga ofruesit e shërbimeve të besuara.

7. Autoriteti 24 muaj pas hyrjes në fuqi të këtij ligji përcakton me urdhër të Drejtorit të Përgjithshëm masat, formatet, procedurat dhe afatet në përputhje me pikat 1, 2, 3, 4, 5 të këtij neni sipas përcaktimeve të nxjerra nga Komisioni Evropian.

## **Neni 27**

### **Kërkesat për ofruesit jo të kualifikuar të shërbimit të besuar**

1. Një ofrues jo i kualifikuar i shërbimit të besuar që ofron shërbime të besuara jo të kualifikuara duhet:

a) të ketë politika të përshtatshme dhe të marrë masat përkatëse për të menaxhuar risqet ligjore, të biznesit, operacionale dhe risqet e tjera të drejtpërdrejta ose të tërthorta në ofrimin e shërbimit të besuar jo të kualifikuar, e cila pavarësisht përcaktimeve të ligjit për sigurinë kibernetike lidhur me menaxhimin e riskut, përfshin të paktën masa në lidhje me:

i) procedurat e pranimit dhe regjistrimit të një shërbimi të besuar;

ii) kontrollet procedurale ose administrative të nevojshme për të ofruar shërbime të besuara;

iii) menaxhimin dhe zbatimin e shërbimeve të besuara;

b) të njoftojë menjëherë dhe jo më vonë se 24 orë kur merr dijeni për çdo shkelje apo ndërprerje të sigurisë, Autoritetin, individët e prekur, publikun nëse është në interesin e publikut dhe autoritetet e tjera përgjegjëse, për çdo shkelje të sigurisë ose ndërprerje në ofrimin e shërbimit ose zbatimin e masave të përmendura në shkronjën “a” pikat “i”, “ii” ose “iii” të këtij neni, që kanë një ndikim të rëndësishëm në ofrimin e shërbimit të besuar ose në të dhënat personale.

2. Autoriteti brenda 24 muajve nga hyrja në fuqi e këtij ligji miraton me urdhër të Drejtorit të Përgjithshëm një listë reference të standardeve, specifikimeve, procedurat sipas shkronjës “a” të pikës 1 të këtij neni, në përputhje me përcaktimet e nxjerra nga Komisioni Evropian.

## **SEKSIONI 3**

### **SHËRBIME TË BESUARA TË KUALIFIKUARA**

## **Neni 28**

### **Mbikëqyrja e ofruesve të kualifikuar të shërbimit të besuar**

1. Ofruesit e kualifikuar të shërbimit të besuar kontrollohen me shpenzimet e tyre të paktën çdo 24 muaj nga një organ i vlerësimit të konformitetit. Kontrolli kryhet për të konfirmuar se ofruesit e

kualifikuar të shërbimit të besuar dhe shërbimet e kualifikuara të besuara të ofruara prej tyre përmbushin kërkesat e përcaktuara në këtë ligj si dhe përcaktimeve në lidhje me menaxhimin e riskut sipas legjislacionit në fuqi për sigurinë kibernetike. Ofruesit e kualifikuar të shërbimit të besuar paraqesin raportin e vlerësimit të konformitetit pranë Autoritetit brenda shtatë ditëve pune pas marrjes së tij nga organi i vlerësimit të konformitetit.

2. Ofruesit e kualifikuar të shërbimit të besuar informojnë Autoritetin, jo më vonë se një muaj për çdo kontroll të planifikuar sipas pikës 1 të këtij neni, duke e lejuar Autoritetin të marrë pjesë në statusin e vëzhguesit me kërkesë të tij.

3. Autoriteti publikon në faqen zyrtare të tij listën me emrat, adresat dhe detajet e akreditimit të organeve të vlerësimit të konformitetit të përmendura në pikën 1 të këtij neni si dhe çdo ndryshim të mëvonshëm të tyre.

4. Pavarësisht parashikimeve në pikën 1 të këtij neni, Autoriteti në çdo kohë mund të kryej kontroll ose t'i kërkojë një organi të vlerësimit të konformitetit të kryejë një vlerësim të konformitetit të ofruesve të kualifikuar të shërbimit të besuar, me shpenzimet e këtyre të fundit , për të konfirmuar plotësimin e kërkesave të përcaktuara në këtë ligj. Kur Autoriteti konstaton shkeljen e rregullave të mbrojtjes së të dhënave personale, ai njofton autoritetin përgjegjës për mbrojtjen e të dhënave personale për rezultatet e kontrolleve të tij.

5. Kur Autoriteti konstaton parregullsi në veprimtarinë e ofruesit të kualifikuar të shërbimit të besuar, rekomandon korrigjimin e tyre brenda një afati të caktuar kohor, në përmbushjen e kërkesave të këtij ligji. Kur ofruesi nuk përmbush zbatimin e rekomandimeve brenda afatit kohor të përcaktuar nga Autoriteti, si dhe marrë në konsideratë shtrirjen, kohëzgjatjen si dhe pasojat e ardhura nga kjo mos përmbushje, ky i fundit vendos për heqjen e statusit “i kualifikuar” për këtë ofrues ose shërbimet e ofruara prej tij.

6. Autoriteti si organi përgjegjës për sigurinë kibernetike kur konstaton se ofruesi i kualifikuar i shërbimit të besuar nuk përmbush kërkesat e përcaktuara lidhur me masat e menaxhimit të riskut sipas legjislacionit në fuqi për sigurinë kibernetike, ky i fundit kur është e justifikuar shtrirja, kohëzgjatja dhe pasojat e atij dëmi, i heq statusin “i kualifikuar” ofruesit të shërbimit të besuar, ose të shërbimit të besuar të ofruar prej tij.

7. Kur Autoriteti informohet nga autoriteti përgjegjës për mbrojtjen e të dhënave personale se ofruesi i kualifikuar i shërbimit të besuar nuk ka përmbushur kërkesat e përcaktuara në legjislacionin në fuqi për mbrojtjen e të dhënave personale, kur justifikohet shtrirja, kohëzgjatja dhe pasojat e dëmit të ardhur, Autoriteti i heq statusin “i kualifikuar” ofruesit ose shërbimit të besuar të ofruar prej tij.

8. Autoriteti informon ofruesin e kualifikuar të shërbimit të besuar për heqjen e statusit “i kualifikuar” ose të statusit të shërbimit “të kualifikuar” të ofruar prej tij, si dhe përditëson listën e besuar.

9. Autoriteti përgjegjës për akreditim brenda 24 muajve nga hyrja në fuqi e këtij ligji në përputhje do të përcaktojë specifikimet dhe procedurat e legjislacionit në fuqi për akreditimin për sa vijon:

a) akreditimin e organeve të vlerësimit të konformitetit dhe për raportin e vlerësimit të konformitetit të përmendur në pikën 1 të këtij neni;

- b) kërkesat e kontrollit për organet e vlerësimit të konformitetit për të kryer vlerësimin e konformitetit, duke përfshirë vlerësimin gjithëpërfshirës, të ofruesve të kualifikuar të shërbimit të besuar, sipas pikës 1 të këtij neni;
- c) skemat e vlerësimit të konformitetit për kryerjen e vlerësimit të konformitetit të ofruesve të kualifikuar të shërbimit të besuar nga organet e vlerësimit të konformitetit dhe për dhënien e raportit sipas pikës 1 të këtij neni.

## **Neni 29**

### **Fillimi i ushtrimit të veprimtarisë së ofruesit të kualifikuar të shërbimit të besuar**

1. Ofruesit e shërbimeve të besuar të cilët nuk kanë marrë statusin “i kualifikuar” dhe synojnë të ofrojnë shërbime të kualifikuara të besuara, brenda 7 ditëve nga fillimi i ushtrimit të aktivitetit, paraqesin pranë Autoritetit një kërkesë të shoqëruar me dokumentacionin përkatës përfshirë edhe raportin e vlerësimit të konformitetit të lëshuar nga një organ i vlerësimit të konformitetit, i cili konfirmon përmbushjen e kërkesave të përcaktuara në këtë ligj si dhe kërkesat lidhur me menaxhimin e riskut sipas legjislacionit në fuqi për sigurinë kibernetike.
2. Autoriteti verifikon nëse ofruesi i shërbimit të besuar dhe shërbimet e besuara të ofruara prej tij përmbushin kërkesat e përcaktuara në këtë ligj dhe, në veçanti kërkesat për ofruesit e kualifikuar të shërbimit të besuar dhe për shërbimet e kualifikuara të besuara që ata ofrojnë.
3. Pavarësisht raportit të vlerësimit të konformitetit të kërkuar sipas pikës 1 të këtij neni Autoriteti si organ përgjegjës për sigurinë kibernetike, kontrollon përmbushjen e kërkesave të ofruesit të shërbimit të besuar lidhur me masat e menaxhimit të riskut sipas përcaktimeve në legjislacionin në fuqi për sigurinë kibernetike si dhe harton brenda dy muajve nga paraqitja e kërkesës një raport me rezultatin. Ky afat mund të zgjatet nga Autoriteti për arsye të justifikuara.
4. Nëse Autoriteti konstaton se ofruesi i shërbimit të besuar dhe shërbimet e besuara të ofruara prej tij përmbushin kërkesat e përcaktuara në këtë ligj, jo më vonë se 3 muaj nga marrja e kërkesës nga ofruesi i shërbimit të besuar, Autoriteti i jep statusin “i kualifikuar” ofruesit të shërbimit të besuar dhe shërbimeve të besuara të ofruara prej tij si dhe përditëson listën e besuar. Nëse verifikimi nga Autoriteti nuk është përfunduar brenda tre muajve nga marrja e kërkesës nga ofruesi i shërbimit të besuar, Autoriteti informon ofruesin e shërbimit të besuar mbi arsyet për vonesën dhe periudhën brenda së cilës duhet të përfundojë verifikimi, e cila nuk mund të kalojë 6 muaj.
5. Ofruesit e kualifikuar të shërbimit të besuar fillojnë të ofrojnë shërbime të kualifikuara të besuar, pas përfitimit të statusit “i kualifikuar” si dhe pas publikimit në listën e besuar.
6. Brenda 24 muajve nga hyrja në fuqi e këtij ligji do të përcaktohen me Vendim të Këshillit të Ministrave formatet dhe procedurat e njoftimit dhe verifikimit lidhur me dokumentacionin e ofruesve të shërbimit të besuar për marrjen e statusit të kualifikuar në përputhje me përcaktimet e nxjerra nga Komisioni Evropian.
7. Brenda 24 muajve nga hyrja në fuqi e këtij ligji do të përcaktohen me Vendim të Këshillit të Ministrave tarifa e regjistrimit të ofruesve të kualifikuar të shërbimit të besuar.

## **Neni 30**

### **Listat e besuara**

1. Autoriteti krijon, mirëmban dhe publikon listën e besuar, që përfshin informacion në lidhje me ofruesit e kualifikuar të shërbimeve të besuara, si dhe informacion mbi shërbimet e besuara të kualifikuara të ofruara prej tyre, që ushtrojnë veprimtarinë në Republikën e Shqipërisë.
2. Autoriteti krijon, ruan dhe publikon, në mënyrë të sigurt, listën e besuar të nënshkruar apo të vulosur elektronikisht dhe e publikon atë në faqen zyrtare të tij, sipas përcaktimeve të standardeve të Bashkimit Evropian.
3. Autoriteti i njofton Komisionit, informacionin mbi autoritetin përgjegjës për krijimin, mbajtjen dhe publikimin e listave kombëtare të besuara, dhe detajet se ku publikohen lista të tilla, certifikatat e përdorura për të nënshkruar ose vulosur listat e besuara dhe çdo ndryshim në to.
4. Autoriteti vë në dispozicion të publikut, nëpërmjet një kanali të sigurt, informacionin e përmendur në pikën 3 të këtij neni në formë të nënshkruar ose të vulosur elektronikisht të përshtatshme për përpunim të automatizuar.
5. Brenda 24 muajve nga hyrja në fuqi e këtij ligji Autoriteti miraton me urdhër të Drejtorit të Përgjithshëm specifikimet teknike dhe formatet për listat e besuara të zbatueshme për qëllimet e pikave 1 deri në 4 të këtij neni në përputhje me specifikimet teknike dhe formatet e miratuara nga Komisioni Evropian.

## **Neni 31**

### **Marka e besuar e BE për shërbimet e besuara të kualifikuara**

1. Pas marrjes së statusit “të kualifikuar” referuar në pikat 2, 3 dhe 4 të nenit 29 të këtij ligji, si dhe pas publikimit në listën e besuar të përmendur në pikën 1 të nenit 30 të këtij ligji, ofruesit e kualifikuar të shërbimeve të besuara mund të përdorin markën e besuar të BE, për të treguar në mënyrë të thjeshtë, të njohur dhe të qartë shërbimet e besuara të kualifikuara që ata ofrojnë.
2. Kur përdoret marka e besuar, për shërbimet e besuara të kualifikuara referuar në pikën 1 të këtij neni, ofruesit e kualifikuar të shërbimeve të besuara duhet të sigurojnë që në faqen zyrtare të tyre të jetë i disponueshëm një link (lidhje) me listën përkatëse të besuar.

## **Neni 32**

### **Kërkesat për ofruesit e kualifikuar të shërbimit të besuar**

1. Një ofrues i kualifikuar i shërbimit të besuar i cili lëshon një certifikatë të kualifikuar ose një vërtetim elektronik të kualifikuar të attributeve, verifikon identitetin dhe kur është e aplikueshme çdo atribut specifik të personit fizik ose juridik të cilit i është lëshuar certifikata e kualifikuar ose vërtetimi elektronik i kualifikuar i attributeve.
2. Verifikimi i identitetit sipas pikës 1 të këtij neni kryhet me mjetet e duhura, nga ofruesi i kualifikuar i shërbimit të besuar, drejtpërdrejt ose nga një palë e tretë, duke u bazuar në një prej metodave të mëposhtme ose në një kombinim të tyre sipas shkronjës “c” të kësaj pike si vijon:

- a) me anë të portofolit ose një mjeti të identifikimit elektronik në përputhje me kërkesat e përcaktuara në nenin 15 të këtij ligji lidhur me nivelin e lartë të sigurisë;
  - b) me anë të një certifikate të nënshkrimit elektronik të kualifikuar ose të vulës elektronike të kualifikuar, të lëshuar në përputhje me shkronjat “a”, “c” ose “ç” të kësaj pike;
  - c) duke përdorur metoda të tjera identifikimi që sigurojnë identifikimin e personit me nivelin me të lartë të sigurisë, konformiteti i të cilit konfirmohet nga një organ i vlerësimit të konformitetit;
  - ç) nëpërmjet pranisë fizike të personit fizik ose të një përfaqësuesi të autorizuar të personit juridik, nëpërmjet autorizimit dhe procedurave të përshtatshme, në përputhje me legjislacionin në fuqi.
3. Verifikimi i attributeve të përmendura në pikën 1 të këtij neni do të kryhet, me mjetet e duhura, nga ofruesi i kualifikuar i shërbimit të besuar, drejtpërdrejt ose me anë të një pale të tretë, në bazë të njërës prej metodave të mëposhtme ose, kur është e nevojshme, në një kombinim të tyre si vijon:
- a) me anë të portofolit ose një mjeti të identifikimit elektronik në përputhje me kërkesat e përcaktuara në nenin 15 të këtij ligji lidhur me nivelin e lartë të sigurisë;
  - b) me anë të një certifikate të nënshkrimit elektronik të kualifikuar ose të vulës elektronike të kualifikuar, të lëshuar në përputhje me shkronjat “a”, “c” ose “ç” të kësaj pike;
  - c) me anë të një vërtetimi elektronik të kualifikuar të attributeve;
  - ç) duke përdorur metoda të tjera, të cilat sigurojnë verifikimin e attributeve me një nivel të lartë të sigurisë, konformiteti i të cilave konfirmohet nga një organ i vlerësimit të konformitetit;
  - d) me anë të pranisë fizike të personit fizik ose të një përfaqësuesi të autorizuar të personit juridik, me anë të autorizimit dhe procedurave të përshtatshme, në përputhje me legjislacionin në fuqi.
4. Autoriteti, me urdhër të Drejtorit të Përgjithshëm të Autoritetit, brenda 24 muajve nga hyrja në fuqi e këtij ligji miraton një listë reference të standardeve dhe, kur është e nevojshme, përcakton specifikimet dhe procedurat për verifikimin e identitetit dhe attributeve në përputhje me pikat 1, 2 dhe 3 të këtij neni sipas përcaktimeve të nxjerra nga Komisioni Evropian.
5. Ofruesi i kualifikuar i shërbimit të besuar duhet:
- a) të informojë Autoritetin të paktën një muaj para, përpara çdo ndryshimi në ofrimin e shërbimeve të besuara të kualifikuara ose brenda tre muajve në rast të ndërprerjes së veprimtarisë;
  - b) të punësojë staf dhe, kur është e zbatueshme, nënkontraktorë të cilët zotërojnë ekspertizë, besueshmëri, përvojë dhe kualifikimet e nevojshme dhe kanë marrë trajnimet e duhura mbi çështjet e sigurisë dhe mbrojtjes së të dhënave personale, si dhe të zbatojë procedurat administrative dhe menaxhuese të cilat korrespondojnë me standardet evropiane dhe ndërkombëtare;
  - c) të zotërojë burimet e nevojshme financiare për dëmshpërblimet e mundshme sipas nenit 23 të këtij ligji.
  - ç) të informojë para se të hyjë në një marrëdhënie kontraktuale, në një mënyrë të qartë dhe të plotë dhe lehtësisht të aksesueshme çdo person që kërkon të përdorë shërbimin e besuar të kualifikuar mbi termat dhe kushtet e përdorimit si dhe çdo kufizim në përdorimin e këtij shërbimi;

- d) të përdorë sisteme dhe produkte të sigurta që janë të mbrojtura ndaj modifikimit dhe që garantojnë sigurinë teknike dhe besueshmërinë e proceseve të mbështetura nga ana e tyre duke përfshirë përdorimin e teknikave kriptografike të përshtatshme;
  - dh) të përdorë sisteme të besueshme për të ruajtur të dhënat që u mundësohen në formë të verifikueshme, në mënyrë që:
    - i) mund të vendosen në dispozicion të publikut vetëm me pëlqimin e personit të cilit i përket kësaj të dhëne;
    - ii) ndryshimet apo shënimet në këto të dhëna mund të bëhen vetëm nga personat e autorizuar;
    - iii) të dhënat mund të kontrollohen për vërtetësinë e tyre.
  - e) pavarësisht nga masat përkatëse për të menaxhuar risqe ligjore, biznesi, operacionale dhe të tjera të drejtpërdrejta ose të tërthorta për ofrimin e shërbimit të besuar të kualifikuar, duhet të përfshihen të paktën masat si më poshtë:
    - i) procedurat e regjistrimit dhe pranimit në një shërbim;
    - ii) kontrolle procedurale ose administrative;
    - iii) menaxhimi dhe implementimi i shërbimeve;
  - ë) në rast të një incidenti njofton menjëherë dhe në çdo rast brenda 24 orëve nga momenti i identifikimit të tij, Autoritetin, individët e prekur, organet e tjera kompetente përkatëse dhe publikun kur është në interes të publikut si dhe për çdo shkelje të sigurisë ose ndërprerje në ofrimin e shërbimit ose zbatimin e masave të përmendura në shkronjën “e” pikat “i”, “ii” ose “iii” të këtij neni që kanë një ndikim të rëndësishëm në ofrimin e shërbimit të besuar ose në të dhënat personale.
  - f) të marrë masat e duhura kundër falsifikimit, vjedhjes, shpërdorimit, fshirjes, ndryshimit ose bërjes të pa aksesueshme të të dhënave ;
  - g) të regjistrojë dhe të mbajë të aksesueshme për aq kohë sa është e nevojshme pas ndërprerjes së veprimtarisë, të gjithë informacionin përkatës mbi të dhënat e lëshuara dhe të marra nga ofruesi i kualifikuar i shërbimit të besuar, me qëllim përdorimin e tyre në procedura ligjore si dhe për të siguruar vazhdimësinë e shërbimit. Një regjistër tillë mbahet në mënyrë elektronike;
  - gj) të ketë një plan të përditësuar për të siguruar vazhdimësinë e shërbimit në përputhje me përcaktimet e nenit 73 pika 3 shkronja “gj”;
  - h) krijon dhe mban një bazë të përditësuar me të dhënat e certifikatave të kualifikuara të lëshuara. Autoriteti kërkon informacion shtesë përveç informacionit të njoftuar sipas shkronjës “a” të kësaj pike ose rezultatit nga raporti i vlerësimit të konformitetit si dhe mund të kushtëzojë dhënien e lejes për implementimin e ndryshimeve të parashikuara për shërbimet e besuara të kualifikuara. Nëse verifikimi nuk është përfunduar brenda tre muajve nga marrja e kërkesës, Autoriteti informon ofruesin e shërbimit të besuar, mbi arsyet e vonës dhe periudhën brenda së cilës duhet të përfundojë verifikimin.
6. Nëse një ofrues i kualifikuar i shërbimit të besuar që lëshon certifikata të kualifikuara vendos të anulojë një certifikatë, këtë anulim duhet ta regjistrojë në bazën e të dhënave të certifikatave dhe të

publikojë statusin e anulimit të certifikatës, në çdo rast brenda 24 orëve pas marrjes së kërkesës së zotëruesit. Anulimi hyn në fuqi menjëherë pas publikimit të tij.

7. Në përputhje me përcaktimet e pikës 6 të këtij neni ofruesit e kualifikuar të shërbimeve të besuara, i sigurojnë palës së përfshirë çdo informacion mbi statusin e vlefshmërisë ose të anulimit të certifikatave të kualifikuara të lëshuara prej tyre. Ky informacion është në dispozicion në çdo kohë, edhe përtej periudhës së vlefshmërisë së certifikatave, në një mënyrë të automatizuar që është e besueshme, pa pagesë dhe efektive.
8. Përcaktimet në pikën 6 dhe 7 të këtij neni do të aplikohen në përputhje me anulimin e vërtetimeve elektronike të kualifikuara të attributeve.
9. Autoriteti, brenda 24 muajve nga hyrja në fuqi e këtij ligji me urdhër të Drejtorit të Përgjithshëm të Autoritetit miraton akte nënligjore, lidhur me listën e reference të standardeve dhe përcakton specifikimet dhe procedurat për kërkesat e përmendura në pikën 2 të këtij neni, në përputhje me përcaktimet e nxjerra nga Komisioni Evropian. Pajtueshmëria me kërkesat e përcaktuara në këtë pikë do të konsiderohen kur këto standarde, specifikime dhe procedura janë përmbushur.

### **Neni 33**

#### **Njohja e shërbimeve të besuara të kualifikuara**

1. Nënshkrimet elektronike të kualifikuara bazuar në një certifikatë të kualifikuar të lëshuar në një shtet anëtar të Bashkimit Evropian dhe vulat elektronike të kualifikuara bazuar në një certifikatë të kualifikuar të lëshuar në një shtet anëtar të Bashkimit Evropian njihen, përkatësisht, si nënshkrime elektronike të kualifikuara dhe vula elektronike të kualifikuara në të gjitha Shtetet e tjera anëtare të Bashkimit Evropian.
2. Pajisjet për krijimin e nënshkrimeve elektronike të kualifikuara dhe pajisjet për krijimin e vulave elektronike të kualifikuara të certifikuara në një shtet anëtar njihen, përkatësisht, si pajisje për krijimin e nënshkrimeve elektronike të kualifikuara dhe pajisje për krijimin e vulave elektronike të kualifikuara në të gjitha shtetet e tjera anëtare.
3. Një certifikatë e kualifikuar për nënshkrimet elektronike, një certifikatë e kualifikuar për vulat elektronike, një shërbim i besuar i kualifikuar i për menaxhimin e pajisjeve të krijimit të nënshkrimeve elektronike të kualifikuara në distancë dhe një shërbim i kualifikuar i besuar për menaxhimin e pajisjeve të krijimit të vulave elektronike të kualifikuara në distancë të ofruara në një Shtet Anëtar njihen përkatësisht, si një certifikatë e kualifikuar për nënshkrimet elektronike, një certifikatë e kualifikuar për vulat elektronike, një shërbim i besuar i kualifikuar për menaxhimin e pajisjeve të krijimit të nënshkrimeve elektronike të kualifikuara në distancë dhe një shërbim i besuar i kualifikuar për menaxhimin e pajisjeve të krijimit të vulave elektronike të kualifikuara në distancë në të gjitha shteteve të tjera anëtare.
4. Një shërbim i kualifikuar i vërtetimit të vlefshmërisë për nënshkrimet elektronike të kualifikuara dhe një shërbim i kualifikuar i vërtetimit të vlefshmërisë për vulat elektronike të kualifikuara të ofruara në një shtet anëtar të Bashkimit Evropian njihen, përkatësisht, si një shërbim i kualifikuar i vërtetimit të vlefshmërisë për nënshkrimet elektronike të kualifikuara dhe një shërbim i

kualifikuar i vërtetimit të vlefshmërisë për vulat elektronike të kualifikuara në të gjithë shtetet anëtare.

5. Një shërbim i kualifikuar i ruajtjes për nënshkrimet elektronike të kualifikuara dhe një shërbim i kualifikuar i ruajtjes për vulat elektronike të kualifikuara të ofruara në një shtet anëtar njihet, përkatësisht, si një shërbim i kualifikuar i ruajtjes për nënshkrimet elektronike të kualifikuara dhe një shërbim i kualifikuar i ruajtjes për vulat elektronike të kualifikuara në të gjithë Shtetet Anëtare.

6. Një vulë kohore elektronike e kualifikuar e ofruar në një Shtet Anëtar të Bashkimit Evropian njihet si një vulë kohore elektronike e kualifikuar në të gjitha shtetet Anëtare të Bashkimit Evropian.

7. Një certifikatë e kualifikuar për autentifikimin e faqes së internetit e lëshuar në një Shtet Anëtar njihet si një certifikatë e kualifikuar për autentifikimin e faqes së internetit në të gjitha Shtetet Anëtare të Bashkimit Evropian.

8. Një shërbim i transmetimit elektronik të kualifikuar të regjistruar i ofruar në një Shtet Anëtar të Bashkimit Evropian njihet si një shërbim i transmetimit elektronik të kualifikuar të regjistruar në të gjitha Shtetet Anëtare të Bashkimit Evropian.

9. Një vërtetim elektronik i kualifikuar i atribuave të lëshuar në një Shtet Anëtar të Bashkimit Evropian njihet si një vërtetim elektronik i kualifikuar i atribuave në të gjitha Shtetet Anëtare të Bashkimit Evropian.

10. Një shërbim i arkivimit elektronik i kualifikuar i ofruar në një Shtet Anëtar të Bashkimit Evropian njihet si një shërbim i arkivimit elektronik i kualifikuar në të gjitha shtetet anëtare të Bashkimit Evropian.

11. Një regjistër elektronik i kualifikuar i ofruar në një Shtet Anëtar të Bashkimit Evropian njihet si një regjistër elektronik i kualifikuar në të gjitha Shtetet Anëtare të Bashkimit Evropian.

12. Ky nen hyn në fuqi me anëtarësimin e Republikës së Shqipërisë në Bashkimin Evropian.

## **SEKSIONI 4 NËNSHKRIMET ELEKTRONIKE**

### **Neni 34**

#### **Efektet ligjore të nënshkrimit elektronik**

1. Një nënshkrim elektronik ka efekt ligjor dhe pranohet si provë në procedura ligjore edhe nëse është në formë elektronike ose nuk plotëson kërkesat për nënshkrimet elektronike të kualifikuara.
2. Një nënshkrim elektronik i kualifikuar ka të njëjtin efekt ligjor si një nënshkrim i bërë dorazi.

### **Neni 35**

#### **Kërkesat për nënshkrime elektronike të avancuara**

1. Nënshkrimi elektronik i avancuar plotëson kërkesat e mëposhtme:
  - a) lidhet në mënyrë unike me nënshkruesin;

- b) mundëson identifikimin e nënshkruesit;
  - c) është krijuar duke përdorur të dhënat për krijimin e nënshkrimit elektronik, me nivel të lartë besueshmërie, që i përkasin ekskluzivisht nënshkruesit;
  - ç) lidhet me të dhënat e nënshkruara në mënyrë të tillë, që të mundësojnë dallimin lehtësisht të çdo ndryshimi të mëpasshëm të këtyre të dhënave.
2. Brenda 24 muajve nga hyrja në fuqi e këtij ligji, Autoriteti miraton me urdhër të Drejtorit të Përgjithshëm standardet e referencës, dhe kur është e nevojshme, specifikimet dhe procedurat, për nënshkrimet elektronike të avancuara sipas përcaktimeve të Komisionit Evropian. Pajtueshmëria me kërkesat për nënshkrimet elektronike të avancuara prezumohet kur një nënshkrim elektronik i avancuar është në përputhje me standardet, specifikimet dhe procedurat.

## **Neni 36**

### **Nënshkrimet elektronike në shërbimet publike**

1. Nëse një nënshkrim elektronik i avancuar kërkohet për t'u përdorur në një shërbim online të ofruar nga ose në emër të një organi publik, organi publik njeh nënshkrimet elektronike të avancuara të bazuara në një certifikatë të kualifikuar për nënshkrimet elektronike, dhe nënshkrimet elektronike të kualifikuara në të paktën një ndër formatet e përcaktuara ose metodat sipas përcaktimeve në pikën 4 të këtij neni.
2. Nëse në shërbimet publike elektronike të ofruara nga një organ publik kërkohet përdorimi i një nënshkrimi elektronik të avancuar bazuar në një certifikatë të kualifikuar për të përdorur një shërbim online të ofruar nga ose në emër të një organi të sektorit publik organi publik njeh nënshkrimet elektronike të avancuara bazuar në një certifikatë të kualifikuar dhe nënshkrimet elektronike të kualifikuara në të paktën një ndër formatet e përcaktuara ose metodat sipas përcaktimeve në pikën 4 të këtij neni.
3. Në një shërbim online ndërkufitar të ofruar nga një organ publik, niveli i sigurisë së nënshkrimit elektronik nuk mund të jetë më i lartë se ai i nënshkrimit elektronik të kualifikuar.
4. Brenda 24 muajve nga hyrja në fuqi e këtij ligji, Autoriteti me urdhër të Drejtorit të Përgjithshëm miraton aktet nënligjore lidhur me formatet e referencës për nënshkrimet elektronike të avancuara dhe metodat e referencës kur përdoren formatet alternative në përputhje me aktet e nxjerra nga Komisioni Evropian..

## **Neni 37**

### **Certifikata për nënshkrim elektronik të kualifikuar**

1. Certifikatat për nënshkrimet elektronike të kualifikuara plotësojnë kërkesat e përcaktuara në aneksin I të këtij ligji.
2. Certifikatat për nënshkrimet elektronike të kualifikuara nuk i nënshtrohen asnjë kërkesë të detyrueshme që tejkalon kërkesat e përcaktuara në aneksin I të këtij ligji.

3. Certifikatat për nënshkrimet elektronike të kualifikuara mund të përfshijnë attribute specifike shtesë jo të detyrueshme, të cilat nuk ndikojnë në ndërveprimin dhe njohjen e nënshkrimeve elektronike të kualifikuara.
4. Nëse një certifikatë për nënshkrimet elektronike të kualifikuara është anuluar pas aktivizimit fillestar, ajo humbet vlefshmërinë e saj që nga momenti i anulimit dhe statusi i saj nuk do të rikthehet në asnjë rrethanë.
5. Autoriteti përcakton rregullat për pezullimin e përkohshëm të një certifikate për nënshkrim elektronik të kualifikuar në këto raste:
  - a) nëse një certifikatë për nënshkrim elektronik të kualifikuar është pezulluar përkohësisht, ajo certifikatë humbet vlefshmërinë e saj për periudhën e pezullimit;
  - b) periudha e pezullimit tregohet qartë në bazën e të dhënave të certifikatës dhe statusi i pezullimit duhet të jetë i dukshëm, gjatë periudhës së pezullimit, nga shërbimi që ofron informacion mbi statusin e certifikatës.
6. Brenda 24 muajve nga hyrja në fuqi e këtij ligji, Autoriteti me urdhër të Drejtorit të Përgjithshëm miraton aktet nënligjore lidhur me standardet e referencës, dhe kur është e nevojshme, specifikimet dhe procedurat, për nënshkrimet elektronike të kualifikuara në përputhje me aktet e nxjerra nga Komisioni Evropian. Pajtueshmëria me kërkesat e përcaktuara në aneksin I të këtij ligji do të prezumohet kur një certifikatë për nënshkrimin elektronik të kualifikuar përputhet me standardet, specifikimet dhe procedurat.

### **Neni 38**

#### **Kërkesat për pajisjet për krijimin e nënshkrimeve elektronike të kualifikuara**

1. Pajisjet për krijimin e nënshkrimeve elektronike të kualifikuara duhet të plotësojnë kërkesat e përcaktuara në aneksin II të këtij ligji.
2. Gjenerimi ose menaxhimi i të dhënave të krijimit të nënshkrimit elektronik ose dublikimi i të dhënave të krijimit të nënshkrimit për qëllime *backup* kryhet vetëm në emër të nënshkruesit, me kërkesë të nënshkruesit dhe nga një ofrues i kualifikuar i shërbimit të besuar që ofron një shërbim të kualifikuar të besuar për menaxhimin e një pajisjeje për krijimin e nënshkrimit elektronik të kualifikuar në distancë.
3. Brenda 24 muajve nga hyrja në fuqi e këtij ligji, Autoriteti me urdhër të Drejtorit të Përgjithshëm miraton aktet nënligjore lidhur me numrat e referencës të standardeve për pajisjet e krijimit të nënshkrimit elektronik të kualifikuar. Pajtueshmëria me kërkesat e përcaktuara në aneksin II të këtij ligji prezumohet kur një pajisje për krijimin e nënshkrimit elektronik të kualifikuar përmbush këto standarde.

### **Neni 39**

#### **Kërkesat për shërbimin e kualifikuar për menaxhimin e pajisjeve të krijimit të nënshkrimit elektronik të kualifikuar në distancë**

1. Menaxhimi i pajisjeve të krijimit të nënshkrimeve elektronike të kualifikuara në distancë si një shërbim i kualifikuar do të kryhet vetëm nga një ofrues i kualifikuar i shërbimit të besuar i cili:
  - a) gjeneron ose menaxhon të dhënat e krijimit të nënshkrimit elektronik në emër të nënshkruesit;
  - b) pavarësisht nga përcaktimi i pikës 1 shkronja “b” të aneksit II të këtij ligji, publikon të dhënat për krijimin e nënshkrimit elektronik vetëm për qëllime *backup*-i, me kusht që të plotësohen kërkesat e mëposhtme:
    - i) siguria e të dhënave të dublikuara duhet të jetë në të njëjtin nivel sigurie si të dhënat origjinale;
    - ii) numri i të dhënave të dublikuara nuk duhet të kalojë minimumin e nevojshëm për të siguruar vazhdimësinë e shërbimit;
  - c) përputhet me çdo kërkesë të identifikuar në raportin e certifikimit të pajisjes specifike të krijimit të nënshkrimit elektronik të kualifikuar në distancë, të lëshuar sipas nenit 40 të këtij ligji.
2. Autoriteti, brenda 24 muajve nga hyrja në fuqi e këtij ligji, me urdhër të Drejtorit të Përgjithshëm, nxjerr aktet nënligjore lidhur me standardet e referencës, dhe kur është e nevojshme, specifikimet dhe procedurat, për qëllimet e pikës 1 të këtij neni sipas përcaktimeve të nxjerra nga Komisioni Evropian.

#### **Neni 40**

#### **Certifikimi i pajisjeve për krijimin e nënshkrimeve elektronike të kualifikuara**

1. Konformiteti i pajisjeve për krijimin e nënshkrimit elektronik të kualifikuar me kërkesat e përcaktuara në aneksin II të këtij ligji certifikohet nga Organet e Vlerësimit të Konformitetit nga lista e publikuar nga Autoriteti ose Komisioni Evropian.
2. Autoriteti publikon emrat dhe adresat e Organeve të Vlerësimit të Konformitetit, të përcaktuara në pikën 1 të këtij neni, në faqen zyrtare të tij.
3. Certifikimi i përmendur në pikën 1 të këtij neni bazohet në pikat si më poshtë:
  - a) në një proces vlerësimi të sigurisë të kryer në përputhje me një nga standardet për vlerësimin e sigurisë së produkteve të teknologjisë së informacionit të përfshira në listën e përcaktuar në përputhje me pikën 2 të këtij neni; ose
  - b) në një proces tjetër përveç procesit të përmendur në shkronjën “a” të kësaj pike, me kusht që të përdorë nivele të krahasueshme sigurie dhe me kusht që Organet e Vlerësimit të Konformitetit të përmendura në pikën 1 të këtij neni të njoftojnë Autoritetin mbi procesin.Ky proces mund të përdoret vetëm në mungesë të standardeve të përmendura në shkronjën “a” të kësaj pike ose kur një proces vlerësimi i sigurisë i përmendur në shkronjën “a” të kësaj pike është në vazhdim.
4. Vlefshmëria e certifikimit të përmendur në pikën 1 të këtij neni nuk duhet të kalojë pesë vjet, me kusht që vlerësimet e vulnerabiliteteve të kryhen çdo dy vjet. Kur vulnerabilitetet identifikohen dhe nuk korrigjohen, certifikimi anulohet.
5. Autoriteti, brenda 24 muajve nga hyrja në fuqi e këtij ligji, me urdhër të Drejtorit të Përgjithshëm, nxjerr aktet nënligjore për të krijuar një listë standardesh për vlerësimin e sigurisë së produkteve të

teknologjisë së informacionit të përmendura në shkronjën “a” të pikës 3 të këtij neni, në përputhje me aktet e nxjerra nga Komisioni Evropian.

6. Autoriteti brenda 24 muaj nga hyrja në fuqi e këtij ligji miraton me urdhër të Drejtorit të Përgjithshëm kriteret e regjistrimit të Organeve të Vlerësimit të Konformitetit sipas pikës 1 të këtij neni përcaktohen.

#### **Neni 41**

##### **Publikimi listës së pajisjeve të certifikuara për krijimin e nënshkrimit elektronik të kualifikuar**

1. Brenda 30 ditëve nga përfundimi i procesit të certifikimit të pajisjeve për krijimin e nënshkrimit elektronik të kualifikuar, Organi i Vlerësimit të Konformitetit i akredituar në Republikën e Shqipërisë dorëzon pranë Autoritetit informacionin mbi pajisjet e certifikuara. Gjithashtu, Autoriteti njeh listën e pajisjeve të certifikuara të publikuar nga Komisioni Evropian. Organet e Vlerësimit të Konformitetit kanë detyrimin që të njoftojnë Autoritetin mbi anulimin e certifikimit të pajisjeve brenda 30 ditëve nga anulimi.

2. Autoriteti krijon, publikon dhe mirëmban listën e pajisjeve të certifikuara për krijimin e nënshkrimeve elektronike të kualifikuara.

3. Brenda 24 muajve nga hyrja në fuqi e këtij ligji, Autoriteti miraton me urdhër të Drejtorit të Përgjithshëm formatin dhe procedurat e zbatueshme për qëllimet e pikës 1 të këtij neni në përputhje me aktet e nxjerra nga Komisioni Evropian.

#### **Neni 42**

##### **Kërkesat për vërtetimin e vlefshmërisë së nënshkrimeve elektronike të kualifikuara**

1. Procesi për vërtetimin e vlefshmërisë së një nënshkrimi elektronik të kualifikuar konfirmon vlefshmërinë e një nënshkrimi elektronik të kualifikuar me kusht që:

- a) certifikata që mbështet nënshkrimin në kohën e nënshkrimit ka qenë një certifikatë për nënshkrimin elektronik të kualifikuar në përputhje me kërkesat e aneksit I të këtij ligji;
- b) certifikata e kualifikuar është lëshuar nga një Ofrues i Kualifikuar i Shërbimit të Besuar dhe ka qenë e vlefshme në kohën e nënshkrimit;
- c) të dhënat e vërtetimit të vlefshmërisë së nënshkrimit korrespondojnë me të dhënat e lëshuara të palëve të përfshira;
- ç) grupi unik i të dhënave që përfaqësojnë nënshkruesin në certifikatë i është dhënë saktë palës së përfshirë;
- d) përdorimi i ndonjë pseudonimi i tregohet qartë palës së përfshirë, në qoftë se pseudonimi është përdorur në kohën e nënshkrimit;
- dh) nënshkrimi elektronik është krijuar nga një pajisje për krijimin e nënshkrimit elektronik të kualifikuar;
- e) integriteti i të dhënave të nënshkruara nuk është kompromentuar;

ë) kërkesat e parashikuara në nenin 35 të këtij ligji janë plotësuar në momentin e nënshkrimit. Pajtueshmëria me kërkesat e përcaktuara në pikën 1 të këtij neni merret në konsideratë kur vërtetimi i vlefshmërisë së nënshkrimeve elektronike të kualifikuara përputhet me standardet, specifikimet dhe procedurat e përmendura në pikën 3 të këtij neni.

2. Sistemi i përdorur për vërtetimin e vlefshmërisë së nënshkrimit elektronik të kualifikuar, u siguron palëve të përfshira rezultatin korrekt të procesit të vërtetimit të vlefshmërisë dhe u lejon palëve të përfshira të identifikojnë çdo problematikë të mundshme lidhur me sigurinë.

3. Autoriteti brenda 24 muajve nga hyrja në fuqi e këtij ligji, me urdhër të Drejtorit të Përgjithshëm nxjerr akte nënligjore lidhur me standardet e referencës dhe, kur është e nevojshme, përcakton specifikime dhe procedura për vërtetimin e vlefshmërisë së nënshkrimeve elektronike të kualifikuara në përputhje me aktet e nxjerra nga Komisioni Evropian.

### **Neni 43**

#### **Kërkesat për vërtetimin e vlefshmërisë së nënshkrimeve elektronike të avancuara bazuar në certifikata të kualifikuara**

1. Procesi për vërtetimin e vlefshmërisë së një nënshkrimi elektronik të avancuar bazuar në një certifikatë të kualifikuar konfirmon vlefshmërinë e një nënshkrimi elektronik të avancuar bazuar në një certifikatë të kualifikuar, duke plotësuar kushtet si më poshtë:

a) certifikata që mbështet nënshkrimin në kohën e nënshkrimit ka qenë një certifikatë për nënshkrimin elektronik të kualifikuar në përputhje me kërkesat e aneksit I të këtij ligji;

b) certifikata e kualifikuar është lëshuar nga një Ofrues i Kualifikuar i Shërbimit të Besuar dhe ka qenë e vlefshme në kohën e nënshkrimit;

c) të dhënat e vërtetimit të vlefshmërisë së nënshkrimit korrespondojnë me të dhënat e lëshuara të palëve të përfshira;

ç) grupi unik i të dhënave që përfaqësojnë nënshkruesin në certifikatë i është dhënë saktë palës së përfshirë;

d) përdorimi i ndonjë pseudonimi i tregohet qartë palës së përfshirë, në qoftë se pseudonimi është përdorur në kohën e nënshkrimit;

dh) integriteti i të dhënave të nënshkruara nuk është kompromentuar;

e) kërkesat e parashikuara në nenin 35 të këtij ligji janë plotësuar në momentin e nënshkrimit.

2. Sistemi i përdorur për vërtetimin e nënshkrimit elektronik të avancuar bazuar në certifikatën e kualifikuar i siguron palës së përfshirë rezultatin e saktë të procesit të vërtetimit të vlefshmërisë si dhe i lejon asaj të zbulojë çdo çështje të rëndësishme të sigurisë.

3. Autoriteti, brenda 24 muajve nga hyrja në fuqi e këtij ligji, miraton me urdhër të Drejtorit të Përgjithshëm standardet e referencës, dhe kur është e nevojshme, përcakton specifikime dhe procedura për vërtetimin e vlefshmërisë së nënshkrimeve elektronike të avancuara bazuar në një certifikatë të kualifikuar, në përputhje me aktet e nxjerra nga Komisioni Evropian. Pajtueshmëria me kërkesat e përcaktuara në pikën 1 të këtij neni presumohet kur vërtetimi i nënshkrimit elektronik

të avancuar bazuar në certifikata të kualifikuara është në përputhje me këto standarde, specifikime dhe procedura.

#### **Neni 44**

##### **Shërbimi i kualifikuar i vërtetimit të vlefshmërisë së nënshkrimeve elektronike të kualifikuara**

1. Shërbimi i kualifikuar i vërtetimit të vlefshmërisë së nënshkrimeve elektronike të kualifikuara ofrohet vetëm nga një Ofrues i Kualifikuar i Shërbimit të Besuar, i cili:
  - a) siguron procesin e vërtetimit të vlefshmërisë në përputhje me përcaktimet e pikës 1 të nenit 43 të këtij ligji ;
  - b) lejon palët e përfshira të marrin rezultatin e procesit të vërtetimit të vlefshmërisë në një mënyrë të automatizuar, e cila është e besueshme, efikase dhe mban nënshkrimin elektronik të avancuar ose vulën elektronike të avancuar të ofruesit të shërbimit të kualifikuar të vërtetimit të vlefshmërisë.
2. Autoriteti, brenda 24 muajve nga hyrja në fuqi e këtij ligji, miraton me urdhër të Drejtorit të Përgjithshëm, standardet e referencës, dhe kur është e nevojshme, përcakton specifikimet dhe procedurat për shërbimin e kualifikuar të vërtetimit të vlefshmërisë të përmendur në pikën 1 të këtij neni, në përputhje me aktet e Komisionit Evropian. Pajtueshmëria me kërkesat e përcaktuara në pikën 1 të këtij neni prezumohet kur shërbimi i kualifikuar i vërtetimit të vlefshmërisë për nënshkrimet elektronike të kualifikuara është në përputhje me këto standarde, specifikime dhe procedura.

#### **Neni 45**

##### **Shërbimi i kualifikuar i ruajtjes së nënshkrimeve elektronike të kualifikuara**

1. Shërbimi i kualifikuar i ruajtjes së nënshkrimeve elektronike të kualifikuara ofrohet vetëm nga një ofrues i kualifikuar i shërbimit të besuar, i cili përdor procedurat dhe teknologjitë e nevojshme për të rritur besueshmërinë e nënshkrimit elektronik të kualifikuar përtej periudhës së vlefshmërisë teknologjike.
2. Pajtueshmëria me kërkesat e përcaktuara në pikën 1 të këtij neni prezumohet kur marrëveshjet për shërbimin e kualifikuar të ruajtjes së nënshkrimeve elektronike të kualifikuara përputhen me standardet, specifikimet dhe procedurat e përmendura në pikën 3 të këtij neni.
3. Autoriteti, brenda 24 muajve nga hyrja në fuqi e këtij ligji, miraton me urdhër të Drejtorit të Përgjithshëm standardet e referencës, dhe kur është e nevojshme, përcakton specifikimet dhe procedurat për shërbimin e ruajtjes të kualifikuar për nënshkrimet elektronike të kualifikuara në përputhje me aktet e nxjerra nga Komisioni Evropian.

### **SEKSIONI 5**

#### **VULA ELEKTRONIKE**

## **Neni 46**

### **Efektet ligjore të vulave elektronike**

1. Një vule elektronike nuk i mohohet efekti ligjor dhe pranimi si provë në procedura ligjore vetëm se është në formë elektronike ose se nuk plotëson kërkesat për vulat elektronike të kualifikuara.
2. Integriteti i të dhënave, me të cilat lidhet vula elektronike e kualifikuar dhe saktësia e origjinës së tyre prezumohen si të vërteta.

## **Neni 47**

### **Kërkesat për vula elektronike të avancuara**

1. Vula elektronike e avancuar plotëson kërkesat e mëposhtme:
  - a) lidhet në mënyrë unike me krijuesin e vulës;
  - b) identifikon krijuesin e vulës;
  - c) krijohet duke përdorur të dhënat e krijimit të vulës elektronike nën kontrollin e plotë të krijuesit të saj, me një nivel të lartë besueshmërie;
  - ç) Lidhet me të dhënat të cilave u referohet, në mënyrë të tillë, që çdo ndryshim i mëpasshëm i tyre të jetë i dallueshëm.
2. Autoriteti, brenda 24 muajve nga hyrja në fuqi e këtij ligji, me urdhër të Drejtorit të Përgjithshëm, nxjerr akte nënligjore lidhur me standardet e referencës, dhe kur është e nevojshme, përcakton specifikimet dhe procedurat për vulat elektronike të avancuara në përputhje me aktet e nxjerra nga Komisioni Evropian. Pajtueshmëria me kërkesat për vulat elektronike të avancuara prezumohet kur një vulë elektronike e avancuar përputhet me standardet, specifikimet dhe procedurat.

## **Neni 48**

### **Vulat elektronike në shërbimet publike**

1. Nëse një vulë elektronike e avancuar kërkohet për t'u përdorur në një shërbim online të ofruar nga ose në emër të një organi publik, organi publik njeh vulat elektronike të avancuara të bazuara në një certifikatë të kualifikuar për vulat elektronike, dhe vulat elektronike të kualifikuara në të paktën një ndër formatet e përcaktuara ose metodat sipas përcaktimeve në pikën 4 të këtij neni.
2. Nëse një vulë elektronike e avancuar bazuar në një certifikatë të kualifikuar kërkohet për t'u përdorur në një shërbim online të ofruar nga ose në emër të një organi publik, organi publik njeh vulat elektronike të avancuara bazuar në një certifikatë të kualifikuar dhe vulat elektronike të kualifikuara në të paktën një ndër formatet e përcaktuara ose metodat sipas përcaktimeve në pikën 4 të këtij neni.
3. Në një shërbim online ndërkufitar të ofruar nga një organ publik, niveli i sigurisë së vulës elektronike nuk mund të jetë më i lartë se ai i vulës elektronike të kualifikuar.

4. Autoriteti, brenda 12 muajve nga hyrja në fuqi e këtij ligji, me urdhër të Drejtorit të Përgjithshëm, miraton aktet nënligjore lidhur me formatet e referencës për vulat elektronike të avancuara dhe metodat e referencës kur përdoren formatet alternative në përputhje me aktet e nxjerra nga Komisioni Evropian.

#### **Neni 49**

##### **Certifikatat e kualifikuara për vulat elektronike**

1. Certifikatat e kualifikuara për vulat elektronike plotësojnë kërkesat e përcaktuara në aneksin III të këtij ligji.
2. Certifikatat e kualifikuara për vulat elektronike nuk do të kenë kërkesa të tjera përveç atyre të përcaktuara në aneksin III të këtij ligji.
3. Certifikatat e kualifikuara për vulat elektronike mund të përfshijnë attribute specifike shtesë jo detyruese. Këto attribute nuk do të ndikojnë në ndërveprimin dhe njohjen e vulave elektronike të kualifikuara.
4. Nëse një certifikatë e kualifikuar për një vulë elektronike është anuluar pas aktivizimit fillestar, ajo humbet vlefshmërinë nga momenti i anulimit/ të saj dhe statusi nuk rikthehet në asnjë rrethanë.
5. Autoriteti përcakton rregullat për pezullimin e përkohshëm të certifikatave të kualifikuara për vulat elektronike sipas kushteve të mëposhtme:
  - a) nëse një certifikatë e kualifikuar për vulë elektronike është pezulluar përkohësisht, ajo certifikatë humbet vlefshmërinë e saj për periudhën e pezullimit;
  - b) periudha e pezullimit tregohet qartë në bazën e të dhënave të certifikatës dhe statusi i pezullimit do të jetë i dukshëm, gjatë periudhës së pezullimit, nga shërbimi që ofron informacion mbi statusin e certifikatës.
6. Autoriteti, brenda 24 muajve nga hyrja në fuqi e këtij ligji, me urdhër të Drejtorit të Përgjithshëm, miraton aktet nënligjore lidhur me standardet e referencës, dhe kur është e nevojshme, përcakton specifikimet dhe procedurat për certifikatat e kualifikuara për vulat elektronike në përputhje me aktet e nxjerra nga Komisioni Evropian. Pajtueshmëria me kërkesat e përcaktuara në aneksin III të këtij ligji prezumohet kur një certifikatë e kualifikuar për vulën elektronike përputhet me standardet, specifikimet dhe procedurat.

#### **Neni 50**

##### **Pajisjet për krijimin e vulave elektronike të kualifikuara**

1. Kërkesat e përcaktuara në nenin 38 të këtij ligji zbatohen për aq sa është e mundur për pajisjet e krijimit të vulave elektronike të kualifikuara.
2. Kërkesat e përcaktuara në nenin 40 të këtij ligji zbatohen për aq sa është e mundur për certifikimin e pajisjeve të krijimit të vulave elektronike të kualifikuara.
3. Kërkesat e përcaktuara në nenin 41 të këtij ligji zbatohen për aq sa është e mundur për publikimin e një liste të pajisjeve të certifikuara për krijimin e vulës elektronike të kualifikuar.

#### **Neni 51**

##### **Kërkesat për shërbimin e kualifikuar për menaxhimin e pajisjeve të krijimit të vulave elektronike të kualifikuara në distancë**

Përcaktimet në nenin 39 të këtij ligji zbatohen për aq sa është e mundur edhe për shërbimin e kualifikuar për menaxhimin e pajisjeve të krijimit të vulave elektronike të kualifikuara në distancë.

#### **Neni 52**

##### **Shërbimi i vërtetimit të vlefshmërisë dhe ruajtjes së vulave elektronike të kualifikuara**

Përcaktimet e bëra në nenet 42, 44 dhe 45 të këtij ligji zbatohen për aq sa është e mundur edhe për vërtetimin e vlefshmërisë dhe ruajtjes së vulave elektronike të kualifikuara.

#### **Neni 53**

##### **Kërkesat për vërtetimin e vlefshmërisë së vulave elektronike të avancuara bazuar në certifikata të kualifikuara**

Përcaktimet në nenin 43 të këtij ligji zbatohet për aq sa është e mundur edhe për vërtetimin e vlefshmërisë së vulave elektronike të avancuara bazuar në certifikata të kualifikuara.

### **SEKSIONI 6**

#### **VULAT KOHORE ELEKTRONIKE**

#### **Neni 54**

##### **Efektet ligjore të vulës kohore elektronike**

1. Një vule kohore elektronike nuk i mohohet efekti ligjor dhe pranimi si provë në procedura ligjore vetëm se është në formë elektronike ose se nuk plotëson kërkesat për vulat kohore elektronike të kualifikuara.
2. Vula kohore elektronike gëzon prezumimin e saktësinë së datës dhe orës që tregon dhe integritetin e të dhënave me të cilat lidhet data dhe ora.

#### **Neni 55**

##### **Kërkesat për vulën kohore elektronike të kualifikuar**

1. Vula kohore elektronike e kualifikuar plotëson kërkesat e mëposhtme:

- a) lidh datën dhe orën me të dhënat, në mënyrë të tillë që të parandalojë në mënyrë të arsyeshme mundësinë që të dhënat të ndryshohen në mënyrë të pazbulueshme;
  - b) bazohet në një burim të saktë kohor, të lidhur me Orën Universale të Koordinuar (UTC);
  - c) nënshkruhet duke përdorur një nënshkrim elektronik të avancuar ose vulosje me një vulë elektronike të avancuar të ofruar nga një ofrues i kualifikuar i shërbimit të besuar, ose me ndonjë metodë ekuivalente.
2. Pajtueshmëria me kërkesat e përcaktuara në pikën 1 të këtij neni presumohet kur lidhja e datës dhe orës me të dhënat dhe saktësia e burimit të kohës përputhen me standardet, specifikimet dhe procedurat e përmendura në pikën 2 të këtij neni.
3. Autoriteti, brenda 24 muajve nga hyrja në fuqi e këtij ligji, miraton me urdhër të Drejtorit të Përgjithshëm, standardet e referencës, dhe kur është e nevojshme, përcakton specifikimet dhe procedurat për lidhjen e datës dhe orës me të dhënat dhe për përcaktimin e saktësisë së burimeve kohore në përputhje me aktet e nxjerra nga Komisioni Evropian.

## **SEKSIONI 7**

### **SHËRBIMET E TRANSMETIMIT ELEKTRONIK TË REGJISTRUAR**

#### **Neni 56**

##### **Efektet ligjore të ofrimit të shërbimeve të transmetimit elektronik të regjistruar**

1. Të dhënat e dërguara dhe të marra duke përdorur një shërbim të transmetimit elektronik të regjistruar, nuk i mohohet efekti ligjor dhe pranimi si provë në procedurat ligjore vetëm me arsyetimin se është në formë elektronike apo se nuk i plotëson kërkesat e ofrimit të shërbimit të transmetimit elektronik të kualifikuar të regjistruar.
2. Të dhënat e dërguara dhe të marra për ofrimin e shërbimit të transmetimit elektronik të kualifikuar të regjistruar, gëzojnë prezumimin e integritetit të të dhënave, dërgimin e të dhënave nga dërguesi i identifikuar, marrjen e tyre nga marrësi i identifikuar, si dhe saktësinë e datës dhe orës së dërgimit dhe të pranimit, të vërtetueshme nga shërbimi i transmetimit elektronik të kualifikuar të regjistruar.

#### **Neni 57**

##### **Kërkesat për ofrimin e shërbimeve të transmetimit elektronik të kualifikuar të regjistruar**

1. Shërbimi i transmetimit elektronik të kualifikuar të regjistruar plotëson kërkesat si më poshtë:
  - a) ofrohet nga një ose më shumë Ofrues të Kualifikuar të Shërbimeve të Besuara;
  - b) garanton nivel të lartë besueshmërie për identifikimin e dërguesit;
  - c) siguron identifikimin e marrësit para transmetimit të të dhënave;

ç) dërgimi dhe marrja e të dhënave garantohen nga një nënshkrim elektronik i avancuar ose nga një vulë elektronike e avancuar e një Ofruesi të Kualifikuar të Shërbimit të Besuar, në mënyrë të tillë që çdo ndryshim i mundshëm i këtyre të dhënave të jetë i identifikueshëm;

d) çdo ndryshim i të dhënave, i nevojshëm për qëllimin e dërgimit apo marrjes së të dhënave, i tregohet në mënyrë të qartë dërguesit dhe marrësit të të dhënave;

dh) data dhe ora e dërgimit dhe marrjes së të dhënave, si dhe çdo ndryshim i tyre tregohen nga një vulë kohore elektronike e kualifikuar.

2. Në rast se të dhënat transferohen midis dy ose më shumë ofrueseve të kualifikuar të shërbimit të besuar, kërkesat e përcaktuara në shkronjat “a”, “b” “c”, “ç”, “d”, “dh”, pika 1 e këtij neni zbatohen nga të gjithë ofruesit e kualifikuar të shërbimit të besuar.

3. Pajtueshmëria me kërkesat e përcaktuara në pikën 1 të këtij neni do të merren në konsideratë kur procesi për dërgimin dhe marrjen e të dhënave është në përputhje me standardet, specifikimet dhe procedurat e përmendura në pikën 4 të këtij neni.

4. Autoriteti brenda 24 muajve nga hyrja në fuqi e këtij ligji, me urdhër të Drejtorit të Përgjithshëm miraton aktet nënligjore lidhur me standardet e referencës dhe kur është e nevojshme specifikimet dhe procedurat për proceset për dërgimin dhe marrjen e të dhënave në përputhje me aktet e nxjerra nga Komisioni Evropian.

5. Ofruesit e shërbimeve të transmetimit elektronik të kualifikuar të regjistruara mund të bien dakord për ndërveprimin midis shërbimeve të kualifikuara të transmetimit elektronik të regjistruar që ata ofrojnë. Ndërveprimi duhet të jetë në përputhje me kërkesat e përcaktuara në pikën 1 të këtij neni dhe kjo përputhshmëri duhet të konfirmohet nga një organ i vlerësimit të konformitetit.

6. Autoriteti brenda 24 muajve nga hyrja në fuqi e këtij ligji, miraton me urdhër të Drejtorit të Përgjithshëm standardet e referencës, dhe kur është e nevojshme specifikimet dhe procedurat për kuadrin e ndërveprimit sipas pikës 5 të këtij neni në përputhje me aktet e nxjerra nga Komisioni Evropian. Specifikimet teknike dhe përmbajtja e standardeve duhet të jenë me kosto efektive dhe proporcionale.

## **SEKSIONI 8**

### **AUTENTIFIKIMI I FAQEVE TË INTERNETIT**

#### **Neni 58**

#### **Kërkesat për certifikata të kualifikuara për autentifikimin e faqeve të internetit**

1. Certifikatat e kualifikuara për autentifikimin e faqeve të internetit plotësojnë kërkesat e përcaktuara në aneksin IV të këtij ligji. Vlerësimi i përputhshmërisë me këto kërkesa kryhet në përputhje me standardet, specifikimet dhe procedurat e përmendura në pikën 4 të këtij neni.

2. Certifikatat e kualifikuara për autentifikimin e faqeve të internetit të lëshuara në përputhje me pikën 1 të këtij neni njihen nga ofruesit e shfletuesve të internetit (*web-browsers*). Ofruesit e shfletuesve të internetit (*web-browsers*) sigurojnë që të dhënat e identitetit dhe atributet shtesë të treguara në

certifikatë janë lehtësisht të përdorshme për përdoruesit. Ofruesit e shfletuesve të internetit (*web-browsers*) sigurojnë mbështetje dhe ndërveprim me certifikata të kualifikuara për autentifikimin e faqeve të internetit të përmendur në pikën 1 të këtij neni, me përjashtim të ndërmarrjeve mikro dhe të vogla sipas legjislacionit në fuqi për ndërmarrjet e vogla dhe të mesme.

3. Certifikatat e kualifikuara për autentifikimin e faqeve të internetit nuk do të kenë kërkesa shtesë të detyrueshme përveç kërkesave të përcaktuara në pikën 1 të këtij neni.

4. Autoriteti brenda 24 muajve nga hyrja në fuqi e këtij ligji, miraton me urdhër të Drejtorit të Përgjithshëm standardet e referencës dhe kur është e nevojshme specifikimet dhe procedurat për certifikatat e kualifikuara për autentifikimin e faqes së internetit, të përmendura në pikën 1 të këtij neni në përputhje me aktet e nxjerra nga Komisioni Evropian.

## **Neni 59**

### **Masat parandaluese të sigurisë kibernetike**

1. Ofruesit e shfletuesve të internetit nuk do të marrin asnjë masë në kundërshtim me detyrimet e përcaktuara në nenin 58 të këtij ligji, veçanërisht kërkesat në lidhje me njohjen e certifikatave të kualifikuara për autentifikimin e faqes në internet dhe shfaqjen e të dhënave të identitetit të ofruara në mënyrë të tillë që të jenë lehtësisht të përdorshme për përdoruesit.

2. Me përjashtim të pikës 1 të këtij neni dhe vetëm në rast të shqetësimeve të ngritura në lidhje me shkeljet e sigurisë ose humbjes së integritetit të një certifikate ose grup certifikatash të identifikuar, ofruesit e shfletuesve të internetit mund të marrin masa parandaluese në lidhje me atë certifikatë ose grup certifikatash.

3. Kur një ofrues i një shfletuesi të internetit merr masa parandaluese në përputhje me pikën 2 të këtij neni, ky i fundit njofton menjëherë, Autoritetin, subjektin të cilit i është lëshuar certifikata si dhe ofruesin e kualifikuar të shërbimit të besuar që ka lëshuar atë certifikatë ose grup certifikatash, problematikat me shkrim, së bashku me një përshkrim të masave të marra për të zbutur këto problematika. Pas marrjes së një njoftimi të tillë, Autoriteti i konfirmon ofruesit të shfletuesit të internetit marrjen e këtij njoftimi.

4. Autoriteti verifikon çështjet e ngritura mbi njoftimin e marrë në përputhje me përcaktimet e shkronjës “i” pikës 3 të nenit 73 të këtij ligji. Nëse në përfundim të verifikimit, nga ana e Autoritetit konstatohet se nuk ka shkaqe për tërheqjen e statusit të kualifikuar të certifikatës, Autoriteti informon ofruesin e shfletuesit të internetit në përputhje me rrethanat dhe i kërkon ofruesit t'i japë fund masave parandaluese të përmendura në pikën 2 të këtij neni.

## **KREU III**

### **SEKSIONI 9**

#### **VËRTETIMI ELEKTRONIK I ATRIBUTEVE**

## **Neni 60**

### **Efektet ligjore të vërtetimit elektronik të attributeve**

1. Vërtetimit elektronik të attributeve nuk i mohohet efekti ligjor ose pranimi si provë në procedura ligjore vetëm se është në formë elektronike ose se nuk plotëson kërkesat për vërtetime elektronike të attributeve të kualifikuara.
2. Vërtetimi elektronik i attributeve të kualifikuar dhe vërtetimi i attributeve të lëshuar nga, ose në emër të një institucioni të sektorit publik përgjegjës për një burim autentik kanë të njëjtin efekt ligjor si vërtetimet e lëshuara në formë shkresore.
3. Vërtetimi i attributeve i lëshuar nga, ose në emër të një organi publik përgjegjës për një burim autentik në një Shtet Anëtar njihet si një vërtetim i attributeve të lëshuar nga ose në emër të një organi publik përgjegjës për një burim autentik në të gjitha Shtetet Anëtare.

## **Neni 61**

### **Vërtetim elektronik i attributeve në shërbimet publike**

Për shërbimet online të ofruara nga një organ i sektorit publik, për të cilët kërkohet identifikimi elektronik nëpërmjet një mjeti të identifikimit dhe autentifikimit elektronik, të dhënat e identifikimit të personit në vërtetimin elektronik të attributeve nuk do të zëvendësojnë identifikimin elektronik duke përdorur një mjet identifikimi elektronik dhe autentifikim për identifikimin elektronik përveç rasteve kur lejohet në mënyrë specifike nga legjislacioni kombëtar. Ky përcaktim vlen edhe për rastet e vërtetimit elektronik të attributeve të kualifikuara.

## **Neni 62**

### **Kërkesat për vërtetimin elektronik të kualifikuar të attributeve**

1. Vërtetimi elektronik i kualifikuar i attributeve plotëson kërkesat e përcaktuara në aneksin V të këtij ligji.
2. Vlerësimi i përputhshmërisë me kërkesat e përcaktuara në aneksin V të këtij ligji kryhet në përputhje me standardet, specifikimet dhe procedurat e përmendura në pikën 5 të këtij neni.
3. Vërtetimet elektronike të kualifikuara të attributeve nuk do të kenë kërkesa të tjera të detyrueshme përveç kërkesave të përcaktuara në aneksin V të këtij ligji.
4. Kur një vërtetim elektronik i kualifikuar i attributeve është anuluar pas lëshimit fillestar, ai e humbet vlefshmërinë e tij që nga momenti i anulimit dhe statusi i tij nuk do të rikthehet në asnjë rrethanë.
5. Autoriteti, brenda 24 muajve nga hyrja në fuqi e këtij ligji, përcakton me akte nënligjore standardet e referencës, dhe kur është e nevojshme, specifikimet dhe procedurat për vërtetimin elektronik të kualifikuar të attributeve në përputhje me aktet e nxjerra nga Komisioni Evropian.

## **Neni 63**

### **Verifikimi i attributeve kundrejt burimeve autentike**

1. Autoriteti siguron që, brenda 24 muajve nga data e hyrjes në fuqi e akteve nënligjore të përmendura në pikën 23 të nenit 7, dhe pikën 6 të nenit 9 të këtij ligji, për atributet e përmendura në aneksin VI të këtij ligji, kudo që këto attribute mbështeten në burime autentike brenda sektorit publik, të merren masa për të lejuar ofruesit e kualifikuar të shërbimeve të besuara të vërtetimeve elektronike të attributeve që t'i verifikojnë ato attribute me mjete elektronike me kërkesë të përdoruesit, në përputhje me përcaktimet ligjore të këtij ligji.
2. Autoriteti, duke marrë parasysh standardet ndërkombëtare përkatëse, miraton me urdhër të Drejtorit të Përgjithshëm standardet e referencës, dhe kur është e nevojshme përcakton specifikimet dhe procedurat për katalogun e attributeve, si dhe skemat për vërtetimin e attributeve dhe procedurat e verifikimit për vërtetimet elektronike të kualifikuara të attributeve në zbatim të pikës 1 të këtij neni në përputhje me aktet e nxjerra nga Komisioni Evropian. Gjithashtu, këto akte nënligjore janë në përputhje me aktet e nxjerra nga Komisioni Evropian të përmendura në pikën 23 të nenit 7 të këtij ligji mbi zbatimin e Portofolit të Identitetit Digjital.

### **Neni 64**

#### **Kërkesat për vërtetimin elektronik të attributeve të lëshuara nga ose në emër të një organi të sektorit publik përgjegjës për një burim autentik**

1. Një vërtetim elektronik i attributeve i lëshuar nga ose në emër të një organi të sektorit publik përgjegjës për një burim autentik plotëson kërkesat e mëposhtme:
  - a) Përbush kërkesat e përcaktuara në aneksin VII të këtij ligji;
  - b) Certifikatën e kualifikuar që mbështet nënshkrimin elektronik të kualifikuar ose vulën elektronike të kualifikuar të organit të sektorit publik të përmendur në pikën 57 të nenit 3 të këtij ligji, i identifikuar si lëshuesi i përmendur në pikën “b”, të aneksit VII të këtij ligji, që përmban një grup specifik të attributeve të certifikuar në një formë të përshtatshme për përpunim të automatizuar:
    - i. duke treguar se organi lëshues është krijuar në përputhje me përcaktimet e legjislacionit kombëtar si përgjegjës për burimin autentik mbi bazën e të cilit është lëshuar vërtetimi elektronik i attributeve ose si organi i caktuar për të vepruar në emër të tij;
    - ii. duke siguruar një grup të dhënash që përfaqësojnë në mënyrë të qartë burimin autentik të përmendur në shkronjën (i) të kësaj pike; dhe
    - iii. duke identifikuar ligjin kombëtar të përmendur në shkronjën (i) të kësaj pike.
2. Organet e sektorit publik të përmendura në pikën 57 të nenit 3 të këtij ligji, të cilët lëshojnë vërtetime elektronike të attributeve përmbushin një nivel sigurie të barabartë me ofruesit e kualifikuar të shërbimeve të besuara në përputhje me nenin 26 të këtij ligji.
3. Autoriteti publikon listën e organeve të sektorit publik të përmendura në pikën 57 të nenit 3, të këtij ligji. Kjo listë përfshin raportin e vlerësimit të konformitetit të lëshuar nga një organ i vlerësimit të konformitetit që konfirmon se kërkesat e përcaktuara në pikat 1, 2 dhe 6 të këtij neni janë përmbushur.

4. Kur një vërtetim elektronik i attributeve i lëshuar nga ose në emër të një organi të sektorit publik përgjegjës për një burim autentik është anuluar pas lëshimit fillestar, ai do të humbasë vlefshmërinë e tij nga momenti i anulimit të tij dhe statusi i tij nuk do të rikthehet.
5. Një vërtetim elektronik i attributeve i lëshuar nga ose në emër të një organi të sektorit publik përgjegjës për një burim autentik konsiderohet se është në përputhje me kërkesat e përcaktuara në pikën 1 të këtij neni, kur është në përputhje me standardet, specifikimet dhe procedurat e përmendura në pikën 6 të këtij neni.
6. Autoriteti, brenda 24 muajve nga hyrja në fuqi e këtij ligji, miraton me urdhër të Drejtorit të Përgjithshëm standardet e referencës, dhe kur është e nevojshme, specifikimet dhe procedurat për vërtetimin elektronik të attributeve të lëshuara nga ose në emër të një organi të sektorit publik përgjegjës për një burim autentik në përputhje me aktet e nxjerra nga Komisioni Evropian. Gjithashtu, këto akte nënligjore janë në përputhje me aktet e nxjerra nga Komisioni Evropian të përmendura në pikën 23 të nenit 7 të këtij ligji mbi zbatimin e Portofolit të Identitetit Digjital.
7. Autoriteti, brenda 24 muajve nga hyrja në fuqi e këtij ligji, miraton me urdhër të Drejtorit të Përgjithshëm standardet e referencës, dhe kur është e nevojshme krijon specifikimet dhe procedurat në zbatim të pikës 3 të këtij neni në përputhje me aktet e nxjerra nga Komisioni Evropian. Gjithashtu, këto akte nënligjore janë në përputhje me aktet e nxjerra nga Komisioni Evropian të përmendura në pikën 23 të nenit 7 të këtij ligji mbi zbatimin e Portofolit të Identitetit Digjital.
8. Organet e sektorit publik të përmendura në pikën 57 të nenit 3 të këtij ligji, që lëshojnë vërtetimin elektronik të attributeve sigurojnë një ndërfaqe me portofolat e identitetit digjital që ofrohen në zbatim të nenit 6 të këtij ligji.

## **Neni 65**

### **Lëshimi i vërtetimit elektronik të attributeve të Portofolave të Identitetit Digjital**

1. Ofruesit e vërtetimeve elektronike të attributeve u ofrojnë përdoruesve të Portofolit të Identitetit Digjital mundësinë për të kërkuar, marrë, ruajtur dhe menaxhuar vërtetimin elektronik të attributeve.
2. Ofruesit e vërtetimeve elektronike të kualifikuara të attributeve do të ofrojnë një ndërfaqe me portofolat e identitetit digjital që ofrohen në zbatim të nenit 7 të këtij ligji.

## **Neni 66**

### **Rregulla shitesë për ofrimin e shërbimeve të vërtetimit elektronik të attributeve**

1. Ofruesit e kualifikuar dhe jo të kualifikuar të shërbimeve të vërtetimit elektronik të attributeve nuk ndërthurin të dhënat personale në lidhje me ofrimin e këtyre shërbimeve me të dhënat personale nga çdo shërbim tjetër i ofruar nga ata ose ofrues të tjerë.

2. Të dhënat personale në lidhje me ofrimin e shërbimeve të vërtetimit elektronik të attributeve mbahen logjikisht të ndara nga të dhënat e tjera të mbajtura nga ofruesi i vërtetimit elektronik të attributeve.
3. Ofruesit e shërbimeve të vërtetimit elektronik të kualifikuar të attributeve zbatojnë ofrimin e këtyre shërbimeve të kualifikuara të besuara në një mënyrë që të jetë e ndarë në mënyrë funksionale nga shërbimet e tjera të ofruara prej tyre.

## **SEKSIONI 10**

### **SHËRBIMET E ARKIVIMIT ELEKTRONIK**

#### **Neni 67**

##### **Efekti ligjor i shërbimeve të arkivimit elektronik**

1. Të dhënave elektronike dhe dokumenteve elektronike të ruajtura duke përdorur një shërbim arkivimi elektronik nuk u mohohet efekti ligjor ose pranimi si provë në procedurat ligjore vetëm se ato janë në formë elektronike ose se nuk ruhen duke përdorur një shërbim të kualifikuar të arkivimit elektronik.
2. Për të dhënat elektronike dhe dokumentet elektronike të ruajtura duke përdorur një shërbim të kualifikuar të arkivimit elektronik presumohet integriteti dhe origjina e tyre për kohëzgjatjen e periudhës së ruajtjes nga ofruesi i kualifikuar i shërbimit të besuar.

#### **Neni 68**

##### **Kërkesat për shërbimet e arkivimit elektronik të kualifikuara**

1. Shërbimet e arkivimit elektronik të kualifikuara plotësojnë kërkesat e mëposhtme:
  - a) Ofrohen nga ofrues të kualifikuar të shërbimeve të besuara;
  - b) përdorin procedura dhe teknologji të përshtatshme për të garantuar qëndrueshmërinë dhe lexueshmërinë e të dhënave elektronike dhe dokumenteve elektronike përtej periudhës së vlefshmërisë teknologjike dhe të paktën gjatë gjithë periudhës së ruajtjes ligjore ose kontraktuale, duke ruajtur integritetin dhe saktësinë e origjinës së tyre;
  - c) Sigurojnë që ato të dhëna elektronike dhe dokumente elektronike ruhen në mënyrë të tillë që të mbrohen nga humbja dhe ndryshimi, me përjashtim të ndryshimeve në lidhje me pajisjen (mediumin) ose formatin e tyre elektronik;
  - ç) T'i lejojnë palët e përfshira të autorizuar të marrin një raport automatik që konfirmon se të dhënat elektronike dhe dokumentet elektronike të marra nga një arkiv elektronik i kualifikuar gëzojnë prezumimin e integritetit të të dhënave nga fillimi i periudhës së ruajtjes deri në momentin e marrjes.

Raporti i përmendur në shkronjën “d”, të pikës 1 të këtij neni duhet të sigurohet në mënyrë të besueshme dhe efikase dhe të ketë nënshkrimin elektronik të kualifikuar ose vulën elektronike të kualifikuar të ofruesit të kualifikuar të shërbimit të arkivimit elektronik.

2. Autoriteti brenda 24 muajve nga hyrja në fuqi e këtij ligji miraton me urdhër të Drejtorit të Përgjithshëm, standardet e referencës dhe kur është e nevojshme, specifikimet dhe procedurat për shërbimet e kualifikuara të arkivimit elektronik në përputhje me aktet e nxjerra nga Komisioni Evropian. Pajtueshmëria me kërkesat për shërbimet e arkivimit elektronik të kualifikuara presumohet kur një shërbim i arkivimit elektronik i kualifikuar përputhet me këto standarde, specifikime dhe procedura.

## **SEKSIONI 11**

### **REGJISTRAT ELEKTRONIKE**

#### **Neni 69**

##### **Efektet ligjore të regjistrat elektronik**

1. Regjistrat elektronik nuk i mohohet efekti ligjor ose pranimi si provë në procedurat ligjore vetëm se është në formë elektronike apo se nuk plotëson kërkesat për regjistrat elektronikë të kualifikuar.
2. Të dhënat e regjistruara të përfshira në një regjistër elektronik të kualifikuar gëzojnë prezumimin se renditja e njëpasnjëshme kronologjike dhe integriteti i tyre janë unike dhe të sakta.

#### **Neni 70**

##### **Kërkesat për regjistrat elektronikë të kualifikuar**

1. Regjistrat elektronikë të kualifikuar plotësojnë kërkesat e mëposhtme:
  - a) krijohen dhe menaxhohen nga një ose më shumë ofrues të kualifikuar të shërbimeve të besuara;
  - b) përcaktojnë origjinën e regjistrimeve të të dhënave në regjistër;
  - c) sigurojnë renditjen e regjistrimeve të të dhënave në regjistër në mënyrë kronologjike, unike dhe sekuenciale;
  - ç) regjistrojnë të dhëna në mënyrë të tillë që çdo ndryshim i mëvonshëm i të dhënave të identifikohet menjëherë, duke siguruar integritetin e tyre me kalimin e kohës.
2. Pajtueshmëria me kërkesat e përcaktuara në pikën 1 të këtij neni presumohet kur një regjistër elektronik plotëson standardet, specifikimet dhe procedurat e përmendura në pikën 3 të këtij neni.
3. Autoriteti brenda 24 muajve nga hyrja në fuqi e këtij ligji, miraton me urdhër të Drejtorit të Përgjithshëm, standardet e referencës, dhe kur është e nevojshme, specifikimet dhe procedurat

për kërkesat e përcaktuara në pikën 1 të këtij neni në përputhje me aktet e nxjerra nga Komisioni Evropian.

## **KREU IV**

### **DOKUMENTET ELEKTRONIKE**

#### **Neni 71**

##### **Efektet ligjore të dokumenteve elektronike**

Dokumentit elektronik nuk i mohohet efekti ligjor dhe pranimi si provë në procedurat ligjore vetëm se është në formë elektronike.

## **KREU V**

### **KUADRI I QEVERISJES**

#### **Neni 72**

##### **Mbikëqyrja e kuadrit ligjor të Portofolit të Identitetit Digjital**

1. Autoriteti është organi përgjegjës për mbikëqyrjen e Portofolit të Identitetit Digjital në Republikën e Shqipërisë, i cili ka kompetencat e nevojshme dhe burimet e duhura për ushtrimin e detyrave të tij në mënyrë efektive.
2. Autoriteti, me anëtarësimin e Republikës së Shqipërisë në Bashkimin Evropian, i njofton Komisionit Evropian emrin dhe adresën e organit mbikëqyrës sipas përcaktimeve të pikës 1 të këtij neni dhe çdo ndryshim të mëvonshëm të tij.
3. Autoriteti sipas pikës 1 të këtij neni kryen detyrat si më poshtë:
  - a) mbikëqyr ofruesit e Portofolit dhe siguron që ata përmbushin kërkesat e përcaktuara në këtë ligj;
  - b) ndërmerr veprime, nëse është e nevojshme, në lidhje me ofruesit e Portofolit kur informohet se ofruesit ose Portofolat që ata ofrojnë bien në kundërshtim me përcaktimet e bëra në këtë ligj.
  - c) bashkëpunon me organet e tjera mbikëqyrëse dhe u ofron atyre ndihmë sipas përcaktimeve në nenet 74 dhe 75 të këtij ligji;
  - ç) kërkon informacionin e nevojshëm për të monitoruar përmbushjen e kërkesave ligjore sipas përcaktimeve në këtë ligj;
  - d) informon për çdo shkelje të rëndësishme të sigurisë ose humbje të integritetit për të cilën Autoriteti merr dijeni gjatë kryerjes së detyrave të tij, dhe në rastin e një shkeljeje të konsiderueshme të sigurisë ose humbjes së integritetit që ka të bëjë me transaksionet ndërkufitare, informon pikën e vetme të kontaktit sipas këtij ligji dhe ligjit për sigurinë kibernetike të shtetit të

prekur, me qëllim informimin e publikut ose për të kërkuar nga ofruesi i Portofolit të njoftojnë shkeljen e sigurisë apo humbjen e integritetit e cila është në interes të publikut;

dh) kryen kontrole në vend dhe në distancë;

e) kërkon nga ofruesit e portofolave të identitetit digjital të korrigjojnë çdo mangësi për përmbushjen e kërkesave të përcaktuara në këtë ligj;

ë) pezullon ose anulon regjistrimin dhe përfshirjen e palëve të përfshira në mekanizmin e përmendur në pikën 7, të nenit 8 të këtij ligji në rastin e përdorimit të paligjshëm të Portofolit;

f) bashkëpunon me autoritetet përgjegjëse për mbrojtjen e të dhënave personale bazuar në legjislacionin në fuqi për mbrojtjen e të dhënave personale në mënyrë të veçantë duke informuar menjëherë kur vihet re se janë shkelur rregullat e mbrojtjes së të dhënave personale dhe për shkeljet e sigurisë që vihen re se përbëjnë shkelje në të dhëna personale;

4. Kur Autoriteti kërkon që ofruesi i një portofoli të korrigjojë çdo mangësi në përmbushjen e kërkesave sipas pikës 3, shkronja “e” të këtij neni, dhe kur ofruesi nuk vepron në përputhje me rrethanat dhe, kur është e aplikueshme brenda një afati kohor të caktuar nga Autoriteti, atëherë ky i fundit duke marrë në konsideratë, shtrirjen, kohëzgjatjen dhe pasojat e këtyre mangësive urdhëron ofruesin të pezullojë ose të ndërpresë ofrimin e Portofolit. Autoriteti informon menjëherë vendimin për të kërkuar pezullimin ose ndërprerjen e ofrimit të Portofolit përdoruesit e Portofolit palët e përfshira si dhe shtetet e tjera në rastin e transaksioneve ndërkufitare.

5. Deri më 31 mars të çdo viti, Autoriteti harton një raport mbi aktivitetet kryesore për vitin e kaluar kalendarik dhe e publikon atë në faqen zyrtare të tij.

6. Autoriteti brenda 24 muajve nga hyrja në fuqi e këtij ligji, miraton me urdhër të Drejtorit të Përgjithshëm formatin dhe procedurat e raportit të përmendur në pikën 5 të këtij neni në përputhje me formatin e përcaktuar nga Komisioni Evropian.

## **Neni 73**

### **Mbikëqyrja e shërbimeve të besuara**

1. Autoriteti Kombëtar për Sigurinë Kibernetike është autoriteti përgjegjës mbikëqyrës për shërbimet e besuara.
2. Me anëtarësimin në Bashkimin Evropian, Republika e Shqipërisë do t'i bëjë të ditur Komisionit Evropian emrin dhe adresën e autoritetit përgjegjës për mbikëqyrjen e shërbimeve të besuara si dhe çdo ndryshim të mëpasshëm të këtyre të dhënave.
3. Kompetencat e autoritetit për mbikëqyrjen e shërbimeve të besuara janë:
  - a) mbikëqyrë ofruesit e kualifikuar të shërbimeve të besuara të vendosur në territorin e Republikës së Shqipërisë dhe siguron, nëpërmjet aktivitetit mbikëqyrës para dhe pas marrjes së statusit të kualifikuar që Ofruesit e Kualifikuar të Shërbimeve të Besuara dhe shërbimet e besuara të kualifikuara të ofruara prej tyre përmbushin kërkesat e përcaktuara në këtë ligj;
  - b) ndërmerr veprime nëse është e nevojshme, në lidhje me ofruesit e pakualifikuar të shërbimeve të besuara të vendosur në territorin e Republikës së Shqipërisë, nëpërmjet aktivitetit

- mbikëqyrës kur ka informacion se këta ofrues të pakualifikuar të shërbimit të besuar ose shërbimet e besuara të ofruara prej tyre, nuk plotësojnë kërkesat e përcaktuara në këtë ligj;
- c) informon pikat e vetme të kontaktit të shteteve të tjera sipas legjislacionit në fuqi për sigurinë kibernetike dhe pikat e kontaktit sipas përcaktimeve të nenit 74 të këtij ligji në rastin e shkeljeve të rëndësishme të sigurisë ose humbjes së integritetit si dhe informon publikun ose i kërkon ofruesit të shërbimit të besuar ta bëjë këtë kur vlerëson se shkelja e sigurisë apo humbja e integritetit është në interes të publikut;
  - ç) bashkëpunon me autoritet mbikëqyrëse të shërbimeve të besuara të shteteve të tjera brenda fushës së përgjegjësisë së tij;
  - d) analizon raportet e vlerësimit të konformitetit të përmendura në nenin 28 pika 1 të këtij ligji dhe nenin 29 pika 1 të këtij ligji;
- dh) me anëtarësimin e RSH në BE Autoriteti raporton pranë Komisionit Evropian për aktivitetet kryesore në përputhje me pikën 5 të këtij neni;
- e) kryen kontrole ose kërkon nga një organ i vlerësimit të konformitetit të kryejë një vlerësim të konformitetit të ofruesve të kualifikuar të shërbimeve të besuara sipas përcaktimeve të pikës 2 të nenit 28 të këtij ligji;
  - ë) bashkëpunon me autoritetin përgjegjës për mbrojtjen e të dhënave personale duke e informuar menjëherë në rast se dyshohen shkelje të rregullave të mbrojtjes së të dhënave personale dhe për shkelje të sigurisë që vihen re se përbëjnë shkelje në të dhëna personale;
  - f) jap statusin “i kualifikuar” ofruesve të shërbimeve të besuara dhe shërbimeve që ata ofrojnë, dhe tërheqë statusin “i kualifikuar” sipas përcaktimeve të neneve 28 dhe 29 të këtij ligji;
  - g) publikon listën e besuar kombëtare sipas përcaktimeve të nenit 30 pika 3 të këtij ligji, si dhe vendimet e tij për dhënien ose heqjen e statusit i kualifikuar;
  - gj) verifikon ekzistencën dhe zbatimin e saktë të dispozitave për planin e përfundimit kur ofruesi i kualifikuar i shërbimit të besuar ndërpret aktivitetin e tij, duke përfshirë mënyrën se si informacioni mbahet i aksesueshëm në përputhje me nenin 32 pika 4, shkronja “g”;
  - h) kërkon nga ofruesit e shërbimeve të besuara të korrigjojnë çdo mangësi për përmbushjen e kërkesave të përcaktuara në këtë ligj;
  - i) shqyrton pretendimet e bëra nga ofruesit e shfletuesve të internetit (ëeb-broërsers) sipas përcaktimeve të nenit 59 të këtij ligji dhe nëse është e nevojshme merr masa.
4. Autoriteti krijon, mirëmban dhe përditëson një infrastrukturë të besuar.
  5. Deri më 31 mars të çdo viti autoriteti harton një raport në lidhje me aktivitetet kryesore të shërbimeve të besuara, të cilin e paraqet në Këshillin e Ministrave si dhe me anëtarësimin në BE ia paraqet këtë raport Komisionit Evropian.
  6. Autoriteti brenda 24 muajve nga hyrja në fuqi e këtij ligji, miraton me urdhër të Drejtorit të Përgjithshëm formatin dhe procedurat e raportit të përmendur në pikën 3 të këtij neni në përputhje me formatin e përcaktuar nga Komisioni Evropian.

## Neni 74

### Pikat e vetme të kontaktit

1. Autoriteti është pika e vetme e kontaktit për shërbimet e besuara, portofolat dhe skemat e identifikimit elektronik .
2. Autoriteti koordinon dhe bashkëpunon me autoritetet përgjegjëse të shteteve të tjera për ofruesit e shërbimeve të besuara për ofruesit e Portofolave dhe sipas rastit, me Komisionin dhe Agjencinë e Bashkimit Evropian për Sigurinë Kibernetike (ENISA).
3. Autoriteti publikon menjëherë emrin dhe adresën e pikës së vetme të kontaktit të caktuar sipas përcaktimeve në pikën 1 të këtij neni si dhe për çdo ndryshim të mëvonshëm.

## **Neni 75**

### **Ndihma e ndërsjellë**

1. Për të lehtësuar mbikëqyrjen dhe zbatimin e detyrimeve të përcaktuara në këtë ligj Autoriteti bashkëpunon me autoritetet mbikëqyrëse të shërbimeve të besuara të shteteve të tjera.
2. Autoriteti bashkëpunon me organet mbikëqyrëse të vendeve të tjera për ndihmën e ndërsjellët, të paktën lidhur me:
  - a) Informimin dhe konsultimin e masave mbikëqyrëse dhe zbatuese; ;
  - b) masat mbikëqyrëse dhe kërkesat për të kryer kontrole në lidhje me raportet e vlerësimit të konformitetit në përputhje me përcaktimet e nenëve 28 dhe 29 të këtij ligji për ofrimin e shërbimeve të besuara;
  - c) kryerjen e kontroleve të përbashkëta me stafet e organeve mbikëqyrëse të shteteve të tjera, kur është e përshtatshme.
3. Autoriteti nënshkruan marrëveshje me autoritetet mbikëqyrëse të shteteve të tjera, në të cilën detajohen procedurat me qellim arritjen e ndihmës të ndërsjellët sipas përcaktime në legjislacionin në fuqi për marrëveshjet ndërkombëtare
4. Në rastet e paraqitjes së një kërkesë për ndihmë, Autoriteti mund ta refuzojë këtë kërkesë në rastet kur:
  - a) ndihma e kërkuar nuk është në proporcion me kompetencat mbikëqyrëse të Autoritetit sipas përcaktimeve në nenet 72 dhe 73 të këtij ligji;
  - b) nuk është kompetent për të ofruar ndihmën e kërkuar;
  - c) ofrimi i ndihmës së kërkuar nuk është në përputhje me përcaktimet e këtij ligji.

## **Neni 76**

### **Grupi Evropian i Bashkëpunimit të Identitetit Digjital**

Me anëtarësimin në Bashkimit Evropian, Autoriteti merr pjesë në aktivitetet e grupit Evropian të bashkëpunimit të identitetit, të përbërë nga përfaqësues të shteteve anëtare të Bashkimit Evropian, të Komisionit Evropian duke kontribuar kryesisht, për:

- a) Shkëmbimin e informacionit dhe praktikave më të mira për portofolat, mjetet e identifikimit elektronik dhe shërbimeve të besuara;

- b) Shkëmbimin e informacionin, pikëpamjet, dhe praktikat më të mira mbi aspektet përkatëse të sigurisë kibernetike në lidhje me portofolat e identitetit digjital, skemat e identifikimit elektronik dhe shërbimet e besuara;
- c) shkëmbejnë praktikat më të mira në lidhje me zhvillimin dhe zbatimin e politikave për njoftimin e shkeljeve të sigurisë dhe masave të përbashkëta
- ç) shkëmbyer informacione përkatëse në lidhje me shërbimet e besuara dhe identifikimin elektronik lidhur me kërcënimet kibernetike, incidentet, dobësitë, iniciativat për rritjen e ndërgjegjësimit, trajnimet, ushtrimet dhe aftësitë, ngritja e kapaciteteve, standardet dhe specifikimet teknike.

## KREU VI

### Kundërvajtjet

#### Neni 77

#### Kundërvajtjet administrative

Në kuptim të këtij ligji, përbëjnë kundërvajtje administrative shkeljet e mëposhtme:

- a) kur Ofruesi i Kualifikuar i Shërbimit të Besuar nuk njofton për fillimin e veprimtarisë, sipas nenit 29 të këtij ligji;
- b) kur ofruesit e shërbimit të portofolit nuk njoftojnë përdoruesit sipas përcaktimeve të pikës 5 të nenit 7 të këtij ligji;
- c) kur ofruesi i kualifikuar i shërbimit të besuar nuk përmbush detyrimet sipas nenit 32 të këtij ligji;
- ç) kur ofruesit jo të kualifikuar të shërbimit të besuar nuk përmbushin kërkesat e përcaktuara në nenin 27 të këtij ligji;
- d) kur ofruesit e kualifikuar të shërbimit të besuar nuk dorëzojnë raportin e vlerësimit të konformitetit sipas përcaktimeve të nenit 28, pika 1 të këtij ligji;
- dh) kur ofruesit e kualifikuar të shërbimit të besuar nuk përmbushin detyrimet e përcaktuara në nenin 57, pika 2 e këtij ligji në rast të transferimit të të dhënave;
- e) kur ofruesit e shërbimit të kualifikuar nuk informojnë klientët e tyre në përputhje me përcaktimet e pikës 4 të nenit 23 të këtij ligji.

#### Neni 78

#### Sanksionet administrative

Kur Autoriteti konstaton shkeljen e dispozitave, të cilat përbëjnë kundërvajtje administrative, sipas nenit 77 të këtij ligji vendos dënimin me gjobë si më poshtë:

- a) shkelja administrative e përcaktuar në shkronjën “e” dënohet me 1 000 000 lekë;
- b) shkeljet administrative të përcaktuara në shkronjat “ç”, “d”, dënohen me 2 000 000 lekë;
- c) shkeljet administrative të përcaktuara në shkronjat “a”, “c”, “dh” dënohen me 5 000 000 lekë;

d) shkelja administrative e përcaktuar në shkronjën “b” dënohet me 10 000 000 lekë.

### **Neni 79**

#### **Procedura e vendosjes së dënimit administrativ gjorbë**

Procedurat e konstatimit, shqyrtimit, ankimit dhe ekzekutimit të kundërvajtjeve administrative janë ato të parashikuara në ligjin në fuqi për kundërvajtjet administrative.

### **KREU VII**

#### **DISPOZITA TË FUNDIT**

### **Neni 80**

#### **Aktet nënligjore**

1. Ngarkohet Këshillit të Ministrave që brenda 24 muajve nga hyrja në fuqi e këtij ligji të miratojë aktet nënligjore në zbatim të pikës 7, nenit 22, pikës 6 dhe 7, të nenit 29.
2. Ngarkohet Drejtori i Përgjithshëm i Autoritetit që brenda 24 muajve nga hyrja në fuqi e këtij ligji të miratojë aktet nënligjore në zbatim të pikës 23, të nenit 7, të pikës 11 të nenit 8, pikës 6 dhe 8, të nenit 9, pikës 5, nenit 11, pikës 3, të nenit 15, pikës 3 të nenit 19, pikës 5 të nenit 20, pikës 7 të nenit 26, pikës 2, të nenit 27, pikës 5, nenit 30, pikës 4, nenit 32, pikës 9, nenit 32, pikës 2, nenit 35, pikës 4, të nenit 36, pikës 6 të nenit 37, pikës 3 të nenit 38, pikës 2, të nenit 39, pikës 5 dhe pikës 6, të nenit 40, pikës 3 të nenit 41, pikës 3 të nenit 42, pikës 3 të nenit 43, pikës 2 të nenit 44, pikës 3 të nenit 45, pikës 2 të nenit 47, pikës 4 të nenit 48, pikës 6 të nenit 49, pikës 3 të nenit 55, pikës 6 të nenit 57, pikës 4 të nenit 58, pikës 5, të nenit 62, pikës 2, të nenit 63, pikës 6 dhe 7 të nenit 64, pikës 2, të nenit 68, pikës 3, të nenit 70, pikës 6, të nenit 72, pikës 5, të nenit 73.

### **Neni 81**

#### **Shfuqizime**

1. Ligji nr.107/2015, “Për identifikimin elektronik dhe shërbimet e besuara”, i ndryshuar dhe ligji nr.9880, datë 25.2.2008 “Për nënshkrimin elektronik”, i ndryshuar, si dhe çdo dispozitë tjetër që bie në kundërshtim me këtë ligj shfuqizohet.
2. Aktet nënligjore, të miratuara në zbatim të ligjit nr.107/2015, “Për identifikimin elektronik dhe shërbimet e besuara”, i ndryshuar dhe ligjit nr.9880, datë 25.2.2008 “Për nënshkrimin elektronik”, i ndryshuar, mbeten në fuqi edhe pas hyrjes në fuqi të këtij ligji, kur nuk bien në kundërshtim me dispozitat e këtij ligji, deri në miratimin e akteve nënligjore në zbatim të këtij ligji.

### **Neni 82**

#### **Dispozita kalimtare**

1. Në ditën e hyrjes në fuqi të këtij ligji, Ofruesit e Kualifikuar të Shërbimeve të Besuara që lëshojnë certifikata të kualifikuara për nënshkrimin elektronik, të regjistruar në bazë të ligjit nr.9880, datë 25.2.2008, “Për nënshkrimin elektronik”, të ndryshuar, vazhdojnë të funksionojnë si Ofrues të Shërbimit të Kualifikuar që lëshojnë certifikata të kualifikuara për nënshkrimin elektronik.
2. Ofruesit e Shërbimeve të Besuara referuar në pikën 1, të këtij neni, janë të detyruar të harmonizojnë veprimtarinë e tyre me dispozitat e këtij ligji brenda 24 muajve nga data e hyrjes në fuqi të këtij ligji, si dhe të paraqesin pranë Autoritetit një raport të lëshuar nga një organ i vlerësimit të konformitetit. Deri në dorëzimin e raportit të vlerësimit nga organ i vlerësimit të konformitetit, si dhe deri në përfundim të vlerësimit nga Autoriteti, Ofruesi i Shërbimeve të Besuara konsiderohet si Ofrues i Kualifikuar i Shërbimit të Besuar.
3. Në qoftë se një ofrues i shërbimeve të besuara që lëshon certifikata të kualifikuara nuk dorëzon pranë Autoritetit raportin e vlerësimit, brenda afatit të përcaktuar në pikën 2, të këtij neni, nuk konsiderohet si Ofrues i Kualifikuar i Shërbimit të Besuar, sipas këtij ligji.

### **Neni 83**

#### **Hyrja në fuqi**

1. Ky ligj hyn në fuqi 15 ditë pas botimit në Fletoren Zyrtare.
2. Neni 5, pika 1, neni 7, pika 17, neni 9 pika 3, neni 10, neni 26, pika 6, neni 33, neni 72, pika 2, neni 73, pika 2, pika 3 shkronja “dh” dhe pika 5, neni 74, pika 2, neni 76 hyjnë në fuqi me anëtarësimin e Republikës së Shqipërisë në Bashkimin Evropian.

## ANEKSI I

### **KËRKESAT PËR CERTIFIKATA TË KUALIFIKUARA PËR NËNSHKRIME ELEKTRONIKE**

Certifikatat të kualifikuara për nënshkrime elektronike përmbajnë:

- a) një tregues, të paktën në një format të përshtatshëm për përpunim të automatizuar, që certifikata është lëshuar si certifikatë e kualifikuar për nënshkrim elektronik;
- b) një grup të dhënash që përfaqësojnë në mënyrë të qartë ofruesin e kualifikuar të shërbimit të besuar që lëshon certifikatat e kualifikuara, duke përfshirë të paktën shtetin në të cilin ky ofrues është vendosur dhe:
  - për një person juridik: emrin dhe, numrin (NUIS) e regjistrimit që figuron në të dhënat zyrtare,
  - për një person fizik: emri i personit;
- c) të paktën emrin e nënshkruesit, ose një pseudonim; nëse përdoret një pseudonim, duhet të tregohet në mënyrë të qartë;
- ç) të dhënat e vlefshmërisë të nënshkrimit elektronik të cilat korrespondojnë me të dhënat e krijimit të nënshkrimit elektronik;
- d) detajet e fillimit dhe përfundimit të periudhës së vlefshmërisë së certifikatës;
- dh) kodin identifikues të certifikatës, i cili duhet të jetë unik për ofruesin e kualifikuar të shërbimit të besuar;
- e) nënshkrimin elektronik të avancuar ose vulën elektronike të avancuar të lëshuar nga ofruesi i kualifikuar të shërbimit të besuar;
- ë) vendndodhjen e certifikatës përkatëse të nënshkrimit elektronik të avancuar ose vulës elektronike të avancuar të përmendur në shkronjën “e” të kësaj pike e cila ofrohet pa pagesë;
- f) informacionin ose vendndodhjen e shërbimeve që mund të përdoren për të njohur statusin e vlefshmërisë së certifikatës së kualifikuar;
- g) sipas rastit, një tregues të përshtatshëm që mundëson përpunimin automatik, që tregon se të dhënat për krijimin e një nënshkrimi elektronik lidhen me të dhënat e vlefshmërisë së tij dhe janë vendosur në pajisjen për krijimin e një nënshkrimi elektronik të kualifikuar.

## ANEKSI II

### **Kërkesat për pajisjet e krijimit të nënshkrimit elektronik të kualifikuar**

- 1. Pajisjet për krijimin e nënshkrimit elektronik të kualifikuar, me anë të mjeteve të përshtatshme teknike dhe procedurale, sigurojnë të paktën që:
  - a) konfidencialiteti i të dhënave të krijimit të nënshkrimit elektronik të përdorura për këtë nënshkrim elektronik është i sigurt;
  - b) të dhënat e përdoruara për krijimin e nënshkrimit elektronik mund të përdoren vetëm një herë;

- të dhënat për krijimin e një nënshkrimi elektronik me një shkallë të lartë sigurie, nuk mund të nxirren jashtë pajisjes për krijimin e nënshkrimit elektronik, si dhe mbrohen në mënyrë të besueshme kundër falsifikimit duke përdorur teknologjinë në dispozicion;
- c) të dhënat për krijimin e një nënshkrimi elektronik mbrohen në mënyrë të sigurt nga nënshkruesi legjitim ndaj përdorimit të paautorizuar.
2. Pajisjet për krijimin e një nënshkrimi elektronik të kualifikuar, nuk i ndryshojnë të dhënat e nënshkruara, apo ndalojnë krijuesin e nënshkrimit të aksesojë të dhënat përpara krijimit të nënshkrimit.

### **ANEKSI III**

#### **Kërkesa për certifikatat e kualifikuara për vulat elektronike**

Certifikatat e kualifikuara për vulat elektronike përmbajnë:

- a) një tregues, që të ketë një formë të përshtatshme për përpunim të automatizuar, i cili tregon që certifikata është lëshuar si certifikatë e kualifikuar për vulën elektronike;
- b) një grup të dhënash që përfaqësojnë qartësisht ofruesin e kualifikuar të shërbimit të besuar që lëshon certifikatat e kualifikuara, duke përfshirë të paktën shtetin në të cilin është vendosur ai ofrues dhe:
  - për një person juridik: emrin dhe numrin e regjistrimit sipas të dhënave zyrtare,
  - për një person fizik: emri i personit;
- c) të paktën emrin e krijuesit të vulës dhe, sipas rastit, numrin e regjistrimit sipas të dhënave zyrtare;
- ç) të dhënat e vlefshmërisë së vulës elektronike, që korrespondojnë me të dhënat e krijimit të vulës elektronike;
- d) data e fillimit dhe përfundimit të periudhës së vlefshmërisë së certifikatës;
- dh) kodin identifikues të certifikatës, i cili duhet të jetë unik për ofruesin e kualifikuar të shërbimit të besuar;
- e) nënshkrimin elektronik të avancuar ose vulën elektronike të avancuar të lëshuar nga ofruesi i kualifikuar i shërbimit të besuar.
- ë) vendin ku lëshohet certifikata për nënshkrimin elektronik të avancuar ose vulën elektronike të avancuar të përmendur në shkronjën “e” të kësaj pike që mundësohet pa pagesë;
- f) informacionin ose vendndodhjen e shërbimeve që mund të përdoren për të kontrolluar statusin e vlefshmërisë së certifikatës së kualifikuar;
- g) sipas rastit, një tregues të përshtatshëm që mundëson përpunimin automatik, që tregon se të dhënat për krijimin e një vule elektronike lidhen me të dhënat e vlefshmërisë së vulës dhe janë vendosur në pajisjen për krijimin e një vule elektronike të kualifikuar

## **ANEKSI IV**

### **Kërkesa për certifikata të kualifikuara për autentifikim të faqeve te internetit**

Certifikatat e kualifikuara për autentifikimin e faqeve të internetit përmbajnë:

- a) një tregues, në format të përshtatshëm për përpunimin e automatizuar, që certifikata është lëshuar si certifikatë e kualifikuar për autentifikimin e faqes së internetit;
- b) një grup të dhënash që përfaqësojnë ofruesin e kualifikuar të shërbimit të besuar që lëshon certifikatat e kualifikuara, duke përfshirë të paktën shtetin në të cilin ky ofrues është vendosur dhe:
  - për një person juridik: emrin dhe numrin NUIS e regjistrimit që figuron në të dhënat zyrtare
  - për një person fizik: emri i personit;
- c) për personat fizikë: të paktën emrin e personit të cilit i është dhënë certifikata, ose një pseudonim; nëse përdoret një pseudonim, ai duhet të tregohet në mënyrë të qartë;
- ç) për personat juridikë: një grup unik të dhënash që përfaqësojnë në mënyrë të qartë personin juridik të cilit i është lëshuar certifikata, me të paktën emrin e personit juridik të cilit i është lëshuar certifikata dhe, sipas rastit, numrin NUIS të regjistrimit që figuron në të dhënat zyrtare;
- d) adresës, duke përfshirë qytetin dhe shtetin, të personit fizik ose juridik të cilit i është lëshuar certifikata dhe ku është e aplikueshme, si figuron në të dhënat zyrtare;
- dh) emrin/emrat e domain-it / domain-eve të menaxhuar nga personi fizik ose juridik të cilit i është lëshuar certifikata;
- e) data e fillimit dhe përfundimit të periudhës së vlefshmërisë së certifikatës;
- ë) kodin e identifikimit të certifikatës, i cili duhet të jetë unik për ofruesin e kualifikuar të shërbimit të besuar;
- f) nënshkrimin elektronik të avancuar ose vulën elektronike të avancuar të lëshuar nga ofruesit të kualifikuar të shërbimit të besuar;
- g) Vendndodhjen e certifikatës përkatëse për nënshkrimin elektronik të avancuar ose vulën elektronike të avancuar të përmendur në shkronjën “f” të kësaj pike e cila ofrohet pa pagesë;
- h) informacionin ose vendndodhjen e statusit të vlefshmërisë së shërbimeve të certifikatës për të njohur statusin e vlefshmërisë së saj .

## **ANEKSI V**

### **Kërkesat për vërtetim elektronik të kualifikuar të attributeve**

Vërtetimi elektronik i kualifikuar i attributeve përmban:

- a) një tregues, në format të përshtatshëm për përpunim të automatizuar, që tregon që vërtetimi është lëshuar si një vërtetim elektronik i kualifikuar i attributeve;
- b) (një grup të dhënash që përfaqësojnë ofruesin e kualifikuar të shërbimit të besuar që lëshon vërtetimin elektronik të kualifikuar të attributeve, duke përfshirë, Shtetin në të cilin është vendosur ai ofrues dhe
  - për një person juridik: emrin dhe numrin e regjistrimit NUIS që figuron në dhënat zyrtare;
  - për një person fizik: emri i personit;

- c) një grup të dhënash që përfaqësojnë subjektin të cilit i referohen atributet e vërtetuara dhe nëse përdoret një pseudonim, ai duhet të tregohet qartë;
- ç) atributin ose atributet e vërtetuara, duke përfshirë, aty ku është e aplikueshme, informacionin e nevojshëm për të identifikuar qëllimin e këtyre attributeve;
- d) datën e fillimit dhe përfundimit të periudhës së vlefshmërisë së vërtetimit;
- dh) kodin e identifikimit të vërtetimit, i cili duhet të jetë unik për ofruesin e kualifikuar të shërbimit të besuar dhe, aty ku është e aplikueshme, treguesin e skemës së vërtetimeve që bën pjesë vërtetimi i attributeve;
- e) nënshkrimin elektronik të kualifikuar ose vulën elektronike të kualifikuar të ofruesit të kualifikuar të shërbimit të besuar;
- ë) vendndodhjen e certifikatës për nënshkrimin elektronik të kualifikuar ose vulën elektronike të kualifikuar të përmendur në shkronjën “e”, e cila ofrohet pa pagesë;
- f) Informacionin ose vendndodhjen e shërbimeve që mund të përdoren për të njohur statusin e vlefshmërisë së vërtetimit të kualifikuar.

## **ANEKSI VI**

### **Lista minimale e attributeve**

Në bazë të nenit 61 Autoriteti siguron marrjen e masave për të lejuar ofruesit e kualifikuar të shërbimit të besuar të vërtetimeve elektronike të attributeve, të verifikojnë me mjete elektronike, me kërkesë të përdoruesit, vërtetësinë e attributeve të mëposhtme kundrejt burimit përkatës autentik në nivel kombëtar ose nëpërmjet ndërmjetësve të caktuar në nivel kombëtar, në përputhje me kombëtar dhe kur këto attribute mbështeten në burime autentike brenda sektorit publik, si :

1. adresa;
2. mosha;
3. Gjinia;
4. Statusi civil;
5. Përbërja e familjes sipas certifikatës familjare;
6. Kombësia ose shtetësia;
7. Kualifikimet arsimore, titujt dhe licencat;
8. Kualifikimet, titujt dhe licencat profesionale;
9. Kompetencat dhe autorizimet për të përfaqësuar personat fizikë ose juridikë;
10. Lejet dhe licencat publike;
11. Për personat juridikë, të dhënat financiare dhe të shoqërisë.

## **ANEKSI VII**

**Kërkesat për vërtetimin elektronik të attributeve të lëshuara nga ose në emër të një organi publik përgjegjës për një burim autentik**

Një vërtetim elektronik i atributëve i lëshuar nga ose në emër të një organi publik përgjegjës për një burim autentik përmban:

- a) një tregues, në një format të përshtatshëm për përpunim të automatizuar, që tregon që vërtetimi është lëshuar si një vërtetim elektronik i atributëve nga ose në emër të një organi publik përgjegjës për një burim autentik;
- b) një grup të dhënash që përfaqësojnë në mënyrë të qartë organin publik përgjegjës që lëshon vërtetimin elektronik të atributëve, duke përfshirë, shtetin në të cilin është krijuar ai organ publik, emrin e tij dhe, sipas rastit, numrin e tij të regjistrimit si figuron në të dhënat zyrtare;
- c) një grup të dhënash që përfaqësojnë qartësisht subjektin të cilit i referohen atributet e vërtetuara dhe nëse përdoret një pseudonim, duhet të tregohet në mënyrë të qartë;
- ç) atributin ose atributet e vërtetuara, duke përfshirë, aty ku është e aplikueshme, informacionin e nevojshëm për të identifikuar qëllimin e këtyre atributëve;
- d) datën e fillimit dhe përfundimit të periudhës së vlefshmërisë së vërtetimit;
- dh) kodin e identifikimit të vërtetimit, i cili është unik për organin publik lëshues dhe, aty ku është e aplikueshme, një tregues të skemës së vërtetimeve ku bën pjesë ky vërtetim i atributëve;
- e) nënshkrimin elektronik të kualifikuar ose vulën elektronike të kualifikuar të autoritetit lëshues;
- ë) vendndodhjen ku lëshohet certifikata për nënshkrimin elektronik të kualifikuar ose vulën elektronike të kualifikuar të përmendur në shkronjën “e”, e cila ofrohet pa pagesë;
- f) informacionin ose vendndodhjen e shërbimeve që mund të përdoren për të njohur statusin e vlefshmërisë së vërtetimit.